

清

史

稿

清史稿

列傳

藩部

清起東夏始定內盟康熙乾隆兩數準部自松花黑龍諸江迤邐而西絕大漠  
巨金山疆丁零鮮卑之域南盡崑崙析支渠搜三危既宅至於黑水皆爲藩部  
撫馭寶賈負越漢唐屏翰之重所以寵之甥舅之聯所以威之銳劉之衝所以  
懷之教政之修所以宣之世更十二載越廿紀虔奉約束聿共盟會與矣昌矣  
若夫元之戚垣自爲風氣明之蕃衛虛有名字蓋未可以同年而語帶礪之盛  
具見世表茲綜事實列之爲傳揆文奮武悅近來遠疏附禦侮可得大凡未造  
顛顛迺彰昨煥盛衰得失斯可鑒已

藩部一

科爾沁

扎賚特

杜爾伯特

郭爾羅斯

喀喇沁

土默特

科爾沁部在喜峯口外至京師千二百八十里東西距八百七十里南北距二千有百里東扎賚特西扎嚕特南盛京邊牆北黑龍江元太祖削平西北諸國建王駙馬等世守之爲今內外扎薩克蒙古所自出科爾沁始祖曰哈布圖哈薩爾元太祖弟今科爾沁六扎薩克及扎賚特杜爾伯特郭爾羅斯阿嚕科爾沁四子部落茂明安烏喇特阿拉善青海和碩特皆其裔哈布圖哈薩爾十四傳至奎蒙克塔斯哈喇有子二長博第達喇號卓爾郭勒諾顏次諾捫達喇號噶勒濟庫諾顏博第達喇子九長齊齊克號巴圖爾諾顏爲土謝圖汗奧巴扎薩克圖郡王布達齊二旗祖次納穆賽號都喇勒諾顏爲達爾漢親王滿珠習禮米圖郡王洪果爾貝勒棟果爾三旗祖次烏巴什號鄂特歡諾顏見郭爾羅斯傳次烏延岱科托果爾次托多巴圖爾喀喇次拜新次額勒濟格卓哩克圖裔不著次愛納噶號車臣諾顏見杜爾伯特傳次阿敏號巴噶諾顏見扎賚特傳諾捫達喇子一曰哲格爾德爲扎薩克鎮國公喇嘛什希一旗祖蒙古強部有三曰察哈爾曰喀爾喀曰衛拉特卽厄魯特明洪熙間科爾沁爲衛拉特所

破避居嫩江以同族有阿嚕科爾沁號嫩江科爾沁以自別扎賚特杜爾伯特郭爾羅斯三部與同牧服屬于察哈爾太祖癸巳年科爾沁台吉齊齊克子翁果岱納穆賽子莽古斯明安等隨葉赫部台吉布齊糾哈達烏拉輝發錫伯卦爾察珠舍里納股諸部來侵攻赫濟格城不下陳兵古喀山上觀禦之至扎喀路諒諸將皆雖衆皆烏合我以逸待勞傷其一二台吉衆自潰命巴圖魯額亦都率百騎挑戰葉赫諸部兵罷攻城來禦逆擊之明安馬蹶裸而遁追至哈達部柴河寨南俘獲其衆戊申征烏拉部圍宜罕阿林城翁果岱復助烏拉台吉布占泰我師擊敗之於是莽古斯明安翁果岱先後遣使乞好天命九年翁果岱子奧巴率族來歸尋爲察哈爾所侵我援之解圍去天聰二年會大軍征察哈爾三年從征明克遵化州圍北京五年圍大凌河降其將祖大壽六年從略大同宣府邊八年復從征明十年春大軍平察哈爾獲元傳國玉璽奧巴子土謝圖濟農巴達禮偕台吉烏克善滿珠習禮布達齊洪果爾喇嘛什希棟果爾及扎賚特杜爾伯特郭爾羅斯喀喇沁土默特敖漢奈曼巴林扎嚕特阿嚕

科爾沁翁牛特諸部長來賀捷以上功德隆宜正位號道朝鮮國王書示推戴  
意四月合疏上尊號改元崇德禮成叙功詔科爾沁部設札薩克五曰巴達禮  
曰滿珠習禮曰布達齊曰洪果爾曰喇嘛什希分領其衆賜親王郡王鎮國公  
爵有差十月命大學士希福等赴其部鞠罪犯頒法律禁姦盜編佐領二年從  
征喀木尼堪部及朝鮮三年征喀爾喀四年春征索倫秋圍明杏山高橋八年  
隨饒餘貝勒阿巴泰護軍統領阿爾津征明及黑龍江諸部順治元年偕札賚  
特杜爾伯特郭爾羅斯兵隨睿親王多爾袞入山海關走流賊李自成追至望  
都二年隨豫親王多鐸定江南三年復隨勦蘇尼特叛人騰機思敗喀爾喀土  
謝圖汗車臣汗援兵七年科爾沁復設札薩克一以棟果爾子彬古倫領之由  
貝勒管郡王爵十三年上以科爾沁及札賚特杜爾伯特郭爾羅斯喀喇沁土  
默特放漢余曼巴林札噶特阿噶科爾沁翁牛特烏珠穆沁浩齊特蘇尼特阿  
巴噶四子部落烏喇特喀爾喀左翼鄂爾多斯諸札薩克歸誠久賜敕曰爾等  
秉資忠直當太祖太宗開創之初誠心歸附職効屏藩太祖太宗嘉爾勳勞崇

封爵號賞賚有加朝覲貢獻時令陛見飲食教誨爲數甚多凡有懷欲吐俱得陳奏心意和諧如同父子朕荷祖宗鴻庥統一寰宇恐于懿行有違成憲未洽恆用憂惕親政以來六年於茲未得與爾等一見雖因萬幾少暇而懷爾之忱時切朕念每思爾等効力有年功績卓著雖在寤寐未之有數誠以爾等相見既疎恐有壅蔽不能上通故特遣官齎敕賜幣以諭朕意嗣後有所欲請隨時奏聞朕無不體卹而行朕方思致天下於太平爾等心懷忠盡毋忘兩朝恩寵朕世世爲天子爾等亦世世爲王享富貴於無窮垂芳名於不朽不亦休乎康熙十一年徵所都兵討逆藩吳三桂十四年勦察哈爾叛人布爾尼先是科爾沁內附莽吉斯以女歸太宗文皇帝是爲孝端文皇后孫烏克善等復以女弟來歸是爲孝莊文皇后曾孫繙爾濟復以女歸世祖章皇帝是爲孝惠章皇后科爾沁以列朝外戚荷國恩獨厚列內札薩克二十四部首有大征伐必以兵從如親征噶爾丹及勦策妄阿喇布坦羅卜藏丹津噶爾丹策凌達瓦齊諸役札薩克等効力戎行莫不懋著勤勞士謝圖親王達爾漢親王卓哩克圖親王

扎薩克圖郡王四府俸幣視他部獨增非惟禮崇姻戚抑以其功冠焉所部六  
旗分左右翼土謝圖親王掌右翼附扎賚特部一旗杜爾伯特部一旗達爾漢  
親王掌左翼附郭爾羅斯部二旗統盟於哲里木右翼中旗駐巴顏和翔左翼  
中旗駐伊克唐噶哩克坡右翼前旗駐席喇布爾哈蘇右翼後旗駐額木圖坡  
左翼前旗駐伊岳克里泊左翼後旗駐雙和爾山府十有七扎薩克和碩土謝  
圖親王一附多羅貝勒一扎薩克和碩達爾漢親王一附卓哩克圖親王一多  
羅郡王二一由親王降襲多羅貝勒一固山貝子一輔國公四一由貝子降襲  
扎薩克多羅扎薩克圖郡王一扎薩克多羅冰圖郡王一扎薩克多羅郡王一  
由貝勒普襲附輔國公一由貝子降襲扎薩克鎮國公一左翼中旗扎薩克達  
爾漢親王滿珠習禮之女孫色布騰巴勒珠爾乾隆十一年三月尙固倫和敬  
公主二十年準噶爾之平以功加雙俸尋以阿睦爾撒納叛事奪爵二十三年  
復封和碩親王三十七年與征金川又以附富德劾阿桂奪爵四十年復之四  
傳至棍楚克林沁襲鎮國公官至御前大臣卒其後左翼中旗輔國公二左翼

後旗輔國公一均停襲左翼後旗扎薩克多羅郡王僧格林沁以軍功晉博多勒噶台和碩親王同治二年予世襲罔替四年以勦捻匪陣亡自有傳其旗增多羅貝勒一輔國公二皆以僧格林沁功僧格林沁子伯彥訥謨祜初封輔國公同治三年晉貝勒四年七月襲博多勒噶台親王爲御前大臣十一月命與左翼中旗扎薩克達爾漢親王索特那木朋蘇克等選馬隊勦奉天馬賊五年二月大破馬賊于鄧家屯三月命捕吉林餘匪六月條陳奉天善後事宜詔如所請行匪平回京光緒初德宗興學命在毓慶宮行走授兼鑲黃旗領侍衛內大臣十七年卒自道光季年海防事起泊咸豐三年粵逆北犯八年海防又急皆調東三盟兵協同防勦科爾沁部爲之冠予爵職給廕襲者皆甲諸部僧格林沁之亡始撤哲里木盟兵旋所部初科爾沁諸旗以距奉天近皆招佃內地民人開墾乾隆四十九年盛京將軍永璋等奏寶圖王旗界內所留民人近鐵嶺者達爾漢王旗所留民人近開原者卽交鐵嶺縣開原縣治之嘉慶十一年十月盛京將軍富俊等以左翼後旗昌圖額勒克地方招墾闢荒經歷四載人



民四萬有奇請增置理事通判治之達爾漢王旗界內所留人民亦交通判就近並治時諸旗扎薩克王公等多招民人墾荒積欠抗租則又請驅逐廷議非之嚴定招墾之禁已佃者不得逐未墾者不得招道光元年左翼中旗扎薩克達爾漢親王布彥溫都爾喇竟以墾事延不就鞠奪扎薩克然私放私墾者仍日有所增流民游匪于焉麇集同治中以昌圖匪亂通判秩輕升爲理事同知光緒二年署盛彥將軍崇厚奏設官撫治以清盜源遂升昌圖同知爲府以原墾達爾漢王旗之梨樹城八面城地置奉化懷德二縣隸之七年又設康平縣于康家屯隸之二十八年盛京將軍增祺奏設遼源州于蘇家屯隸之皆治左翼三旗墾民是年右翼前旗札薩克圖郡王烏泰以放荒事屢被劾命禮部尙書裕德會增祺勘治四月覆奏言烏泰已放荒界南北長三百餘里東西寬一百餘里外來客民有一千二百六十餘戶烏泰不諳放荒章程以致嗜利之徒任意墾佔轉相私售實已暗增數千餘戶新開荒地又增長三百餘里寬一百餘里梅楞齊莫特色楞等復袒護荒戶阻台吉壯丁在新放荒地游牧協理

台吉巴圖濟爾噶勒遂以歛財聚衆不恤旗艱控之理藩院經傳集烏泰等親  
自宣導均各悔悟願前洗前愆驅除惡和同辦理旗務請將烏泰巴爾圖濟  
爾噶勒暫革仍准留任勒限三年限滿經理得宜由圍旗呈請開復否則永遠  
革任齊莫特色楞等均分別屏黜不准干預旗務並爲定領荒招墾章程荒價  
則一半報効國家一半歸之蒙旗升科則每晌以中錢二百四十爲籌餉設官  
等經費以四百二十作蒙古生計自王府至台吉壯丁喇嘛各有得數仍酌留  
餘荒講求牧養均報可十月增祺又奏勸朋是旗洮爾河南北已墾未墾之地  
約有一千餘萬畝派員設局丈放三十年以其地置洮南府並置靖安開通二  
縣隸之三十一年盛京將軍趙爾巽以右翼後鎮國公旗墾地置安廣縣而法  
庫門舊爲左翼中達爾漢王諸旗招墾地亦置同知治之三十四年東三省總  
督徐世昌以右翼中旗和碩土謝圖親王墾地置禮泉等縣于是科爾沁六旗  
墾地幾遍郡縣亦最多諸札薩克王公等得租豐溢而化沙磧爲膏沃地方亦  
日臻富庶諸札薩克王公等世次皆見表惟右翼和碩土謝圖親王色旺諾爾

布桑寶以庚子之變中外多故殞于非命裕德等勘奏謂爲屬員逼勒而死因請治倡勸者如律尋增祺奏以族子業喜海順承襲傳爵如故凡蒙旗札薩克爲一旗之長制如一品與都統等其輔曰協理台吉屬曰管旗章京副章京參領佐領蒙語管旗章京曰梅楞參領曰札蘭佐領曰蘇木蘇木實分治土地人民其佐領之額右翼中旗二十二左翼中旗四十六右翼前旗後旗均十六左翼前旗後旗均三凡哲里木盟重大事件科爾沁六旗以近奉天故由盛京將軍專奏郭爾羅斯前旗一旗以近吉林郭爾羅斯後旗札賚特杜爾伯特三旗以近黑龍江故各由其省將軍專奏扎賚特部元太祖弟哈布圖哈薩爾十五傳至博第達喇有子九阿敏其季也與兄齊齊克納穆賽等隣牧號所部曰扎賚特天命九年阿敏子蒙袞偕科爾沁台吉奧巴遣使乞好優詔答之遂率屬來歸順治五年授蒙袞子色稜扎薩克以與科爾沁同祖附之隸哲里木盟旗一駐圖卜紳察罕坡其爵爲扎薩克多羅貝勒由固山貝子晉襲光緒二十五年黑龍江將軍恩澤等奏以戶部咨黑龍江副都統壽山條奏請放蒙古各旗

荒地派員赴扎賚特旗剴切勸商願將屬界南接郭爾羅斯前旗東濱嫩江之四家子二龍核口等處指出開放南北約長三百餘里東西寬百餘里或三四十里設局勘辨並謂若大東以至大西使沿邊各蒙旗均能招民墾荒則強富可期即可無北鄙之驚下所司議行先是哲里木盟諸旗皆以禁墾甲令過嚴無敢明言招墾者至是始接踵開放云三十一年以墾地置大賚廳治之是部有佐領十六

杜爾伯特部在喜峰口外至京師二千五十里東西距百七十里南北距二百四十里東及北皆黑龍江西扎賚特南郭爾羅斯北界索倫藩部蒙古稱杜爾伯特部者二同名異族一姓鮮囉斯爲衛拉特台吉孛罕裔旗十有四駐牧烏蘭石木稱外扎薩克別有傳一姓博爾濟吉特爲元太祖弟哈布圖哈薩克裔卽今駐牧喜峯爾口外之內札薩克哈布圖哈薩爾十六傳至愛納噶始以名其部天命九年愛納噶子阿都齊偕科爾沁台吉奧巴遣使乞好優詔答之遂率屬來歸順治五年授阿都齊子色稜扎薩克以與科爾沁同祖附之隸哲里

木盟旗一駐多克多爾坡其爵爲扎薩克固山貝子同治二年杜爾伯特貝子貢噶絳克坦咨黑龍江將軍請將交界重立封堆尋勘明巴勒該岡以北黑龍江界內有杜爾伯特蒙人等居屯四處牌莫多以南杜爾伯特界內有黑龍省屬人等居屯八處舊界所佔均係曠地應准各就其所以安生計蒙古越佔巴勒該岡地應將南榆樹改爲新界有屬人等越佔牌莫多地應將四六山改爲新界共立界堆十七奏入詔如議四年貢克絳克坦復咨以所立界堆將蒙古田地草廠歸入省界有碍蒙古生計詔派副都統克蒙額與哲里木盟長及杜爾伯特會勘劃還塔爾敦屯以東第十第十一封堆之西蒙古墳塋房基平毀二十顆樹封堆之南蒙界旗屯房屋又增立界堆十有九並以牌莫多以南官屯舊佔蒙屯較巴勒該岡以北蒙屯舊佔省屯多地十三里撥二十顆樹封堆之南省屬空閑地如數補之七年六月奏結請飭貝子貢噶絳克坦嚴約屬人照界永遠遵守報可十年以是旗私招民人墾荒嚴申禁令革其協理台吉光緒二十五年將軍恩澤以招墾蒙地關邊隘富強大計復奏派員商勸放墾時

東三省鐵路之約既成是部當鐵路之衝交涉多商民萃集三十二年因以所部墾地置安達廳治之隸黑龍江是部一旗有佐領二十五

郭爾羅斯部在喜峯口外至京師千八百九十七里東西距四百五十里南北距六百六十里南盛京邊塔東吉林府西及北科爾沁元太祖遣弟哈布圖哈薩爾征郭爾羅斯部十六傳至烏巴什卽以爲所部號子莽果仍之天命九年莽果子布木巴偕科爾沁台吉奧巴遣使乞好優詔答之遂率屬來歸會察哈爾林丹汗掠科爾沁遣軍山郭爾羅斯境往援至農安塔林丹汗遁不敢復犯科爾沁及郭爾羅斯諸部嗣設札薩克二曰布木巴爵鎮國公曰固穆爲布木巴從弟爵輔國公以與科爾沁同祖附之隸哲里木盟旗二前旗駐固爾班察罕後旗駐榛子嶺爵三札薩克輔國公一札薩克台吉一附鎮國公一是部布木巴一旗爲前旗近吉林嘉慶五年吉林將軍秀林奏以郭爾羅斯墾地置長春理事通判並請分征其租上以非體斥之十傳至喀爾瑪什迪於光緒九年削札薩克公爵如故以其族等台吉巴雅斯呼朗代爲札薩克光緒十三年復

升長春廳爲府於是旗界內遼黃龍府舊地置農安縣隸之光緒三十四年又以墾地增廣分置長嶺縣宣統二年分長春府地置德惠縣旋又定國家與蒙古分收民租例是旗置郡縣凡四皆隸吉林固穆一旗爲後旗近黑龍江亦當東三省鐵路之衝光緒三年以墾地置肇州廳隸黑龍江後又分置肇東經歷是部二旗墾地分隸吉林黑龍江二省前旗有佐領二十三後旗有佐領三十四

喀喇沁部在喜峰口外至京師七百六十里東西距五百里南北距四百五十里東土默特及敖漢西察哈爾正藍旗牧廠南盛京邊牆北翁牛特元時有札爾楚泰者生濟拉瑪佐元太祖有功七傳至和通有衆六千戶游牧額沁河號所部曰喀喇沁子格喀博囉特繼之生子二長格喀勒泰宰桑爲札薩克杜梭貝勒岡喀思奇布及札薩克一等塔布囊格喀爾二旗祖次岡喀巴圖爾爲札薩克鎮國公色稜一旗祖格喀勒泰宰桑子四長恩克次準岡次鄂穆克岡均居喀喇沁天聰二年二月恩克曾孫蘇布地以察哈爾林丹汗虐其部偕弟萬

丹偉徵等乞內附表奏察哈爾汗不道喀喇沁被虐因偕土默特鄂爾多斯阿  
巴噶喀爾喀諸部兵赴土默特之趙城擊察哈爾兵四萬還值赴明請賞兵三  
千復殪之察哈爾根本動搖事機可乘皇帝儆興師進勦喀喇沁當先諸部至  
諭遣使面議七月遣喇嘛偕五百三十八人來朝命貝勒阿濟格領託迎宴刑  
白馬烏牛誓九月上親征察哈爾蘇布地等迎會於綽洛郭勒賜賚甚厚三年  
正月敕所部遵國憲六月蘇布地及圖噶巴圖爾孫色稜等率屬來歸詔還舊  
牧十月上征明以塔布囊布爾哈圖爲導入遊化駐兵羅文峪四年布爾哈圖  
爲明兵所圍擊敗之擒副將丁啓明及遊擊一都司二詔嘉其功賜莊田僕從  
及金幣六月山都爾弼從征察哈爾林丹汗遁以所收察哈爾糧貯遼河守之  
復分兵隨貝勒阿濟格略明大同宣府邊八年正月偕巴林阿噶科爾沁阿巴  
噶諸部兵收撫察哈爾流民五月從征明大同至朔州九年正月詔編所部佐  
領以蘇布地子固噶思奇布掌右翼色稜掌左翼五月選兵從征明敗之於遼  
河源崇德元年詔授布爾哈圖一等子賜號岱達爾漢塔布囊二年遣大臣阿



什達爾漢等赴其部理庶獄三年九月隨大軍自密雲入明邊敗其兵六千十月從征前屯衛及寧遠七年從圍薊州過北京下山東順治元年從入山海關擊流賊李自成六年從征喀爾喀康熙十三年大軍勦逆藩耿精忠等所部塔布賽霍濟格爾偕土默特塔布賽善達等以兵赴兗州十七年諭曰塔布賽霍濟復格爾等前自兗州赴浙江聽康親王傑書調度各統所屬官兵征勦逆賊深入閩省同大兵平定逆藩耿精忠行間効力身先士卒衝鋒陷陣奮勇用命深爲可嘉宜降恩綸卽行議叙以勵後効二十五年上駐蹕和爾和諭曰塔布賽霍濟格爾出征時最著勤勞今已溘逝朕至此地道散秩大臣鄂齊等攜茶酒往奠二十五年叙平浙江福建功賜叅領巴雅爾等十人世職二十九年從征噶爾丹敗之於烏蘭布通四十四年詔增設一旗以塔布賽格爾領之五十四年徵所部兵千赴推河防禦策妄阿喇布坦尋命侍郎覺和托等攜帑萬兩賜之雍正九年從征噶爾丹策凌所部初設二旗右翼駐錫伯河北左翼駐巴顏珠爾克後增一旗駐左右翼界內爵六親王品級札薩克多羅杜稜郡王一

山貝勒晉襲附領國公一由貝子降襲輔國公一札薩克多羅貝勒一由貝子晉襲扎薩克固山貝子一由鎮國公晉襲扎薩克公品級一等塔布囊一乾隆四十一年以所部墾地設平泉州嘉慶八年降爵貝子丹巴多爾濟以獲逆犯陳德功子貝勒官至領侍衛內大臣御前大臣卒光緒二十三年扎薩克一等台吉塔布囊巴特琪鄂特薩爾以事革復以貝勒熙凌阿襲存爵五是部招民墾地最在先乾隆十四年始定不許容留民人多墾地畝之禁道光十九年復定喀喇沁土默特種地民人不得以所種地畝折算蒙古除貸銀錢例光緒十七年赦漢部金丹道匪之變是部同時被擾事平特頒帑賑恤之二十九年熱河都統錫良以左旗招華商承辦全旗五金各鑛中旗同道勝銀行立有合同開八里罕等地金鑛與定章應聲明華洋股本若干及只准指定一處不准兼指數處者不符請飭外務部妥議辦法下所司議申定章約束之是部右翼旗有佐領四十四中旗有佐領三十八左翼旗有佐領四十與土默特二旗統盟於卓索圖嘉慶中設熱河都統後是盟與昭烏達盟重大事件皆由都統專奏

道光末籌直隸海防咸豐初勦粵匪皆徵是盟之兵與哲里木昭烏達號東三盟兵頗著功績云

土默特部在喜峯口外至京師千里東西距四百六十里南北距三百有十里東養息牧廠西喀喇沁南盛京邊牆北喀爾喀左翼及敖漢土默特分左右翼異姓同牧主左翼者爲元臣濟拉瑪裔自濟拉瑪十三傳至善巴與喀喇沁爲近族主右翼者爲元太祖裔自元太祖十九傳至鄂木布楚琥爾生子固穆與歸化城土默特爲近族天聰三年善巴鄂木布楚琥爾各率屬來歸八年六月選兵從征明頒示軍律七月由獨石口入明邊會大軍于保安州分兵隸都統武訥格略察哈爾邊九年詔編所部佐領設扎薩克三曰善巴廢曰格爾曰鄂木布楚琥爾廢格爾者善巴族也崇德二年以罪削扎薩克善巴領其衆自是土默特分左右翼命善巴及鄂木楚琥爾掌之是年遣大臣阿什達爾漢等赴其部理庶獄六年從喇明錦州敗總督洪承疇援兵八年隨饒餘貝勒阿巴泰征明順治元年從入山海關擊流賊李自成三年隨勦蘇尼特部叛人騰機思

康熙元年喀爾喀台吉巴爾布冰圖來歸詔附土默特牧十三年大軍勦逆藩  
耿精忠等詔所部塔布囊善達借喀喇沁塔布囊霍濟格爾以兵赴兗州聽調  
十七年調赴浙江隨康熙親王傑書進勦閩地悉定諭優叙五十五年詔選兵千  
隨公傅爾丹屯鄂爾坤五十九年以旱歉收賜帑賑之雍正三年塔布囊沙津  
達賚隨大軍防禦準噶爾七年封鎮國公九年大將軍傅爾丹擊準噶爾于和  
通呼爾哈諾爾沙津達賚陣逃削爵而土默特部將之隨參贊內大臣馬蘭泰  
者敗賊西爾哈昭斬獲甚衆稍雪恥焉所部二旗左翼駐海他哈山右翼駐巴  
顏和朔隸卓索圖盟爵三扎薩克多羅達爾漢貝勒一由鎮國公晉襲附喀爾  
喀貝勒一扎薩克固山貝子一乾隆四十一年以所部墾地置朝陽縣同治九  
年以右翼旗箭丁等屢控扎薩克貝子索特那木色登科派太重於是管旗章  
京阿阿尙等以因公派錢不能體恤均革熱河都統庫克吉泰因奏變通土默  
特比丁章程申明交納丁錢舊章箭丁子女不許妄行役使及隨侍陪嫁八枝  
箭丁仍歸土默特管束光緒十七年赦漢部金丹道匪之變是部同時被擾事

平賑恤之左翼有佐領八十右翼有佐領九十於諸旗爲特多焉

藩部二

敖漢

奈曼

巴林

扎魯特

阿嚕科爾沁

翁牛特

克什克騰

喀爾喀左翼

烏珠穆沁

浩齊特

蘇尼特

阿巴噶

阿巴哈納爾

敖漢部在喜峯口外至京師千有十里東西距百六十里南北距二百八十里東奈曼西喀喇沁南土默特北翁牛特內扎薩克二十四部自科爾沁扎賚特杜爾伯特鄂爾羅斯喀喇沁土默特左翼阿嚕科爾沁翁牛特阿巴噶阿巴哈納爾四子部落茂明安烏喇特外皆元太祖十五世孫達延車臣汗之裔達延

車臣汗子十一長圖嚕博羅特其嗣爲敖漢奈曼烏珠穆沁浩齊特蘇尼特五部第三子巴爾蘇博羅特其嗣爲土默特右翼一旗及鄂爾多斯部第五子阿爾楚博羅特其嗣爲巴林扎嚕特二部第六子鄂齊爾博羅特其嗣爲克什克騰部第十一子格喀森扎扎賚爾琿台吉其嗣爲喀爾喀左翼喀爾喀右翼二部餘皆不著圖嚕博羅特子二長博第阿喇克詳烏珠穆沁傳次納密克生貝瑪士謝圖子二長岱吉杜楞號所部曰敖漢次額森偉徵諾顏詳奈曼傳岱吉杜楞子索諾木杜稜及塞臣卓哩克圖初皆服屬于察哈爾以林丹汗不道天聰元年偕奈曼部長袞楚克率屬來歸詔索諾木杜稜居開原塞臣卓哩克圖汗舊牧二年偕奈曼巴林扎嚕特諸台吉勦察哈爾諭勿妄殺降駸汛哈後索諾木杜稜以私獵哈達葉赫山罪議奪開原地塞臣卓哩克圖卒子旺第繼爲部長八年冬遣大臣赴碩翁科爾定諸藩牧以扎哈蘇台囊嘉台爲敖漢界崇德元年詔編所部佐領設扎薩克以旺第領之爵多羅郡王順治元年從入山海關擊流賊李自成康熙十三年請選兵隨勦逆藩吳三桂詔還牧聽調十四

年隨大軍勦察哈爾叛人布爾尼十五年徵兵赴河南尋調荊州越三年凱旋  
二十八年秋詔發喜峯口倉粟賑所屬貧戶三十七年冬遣官往教之耕諭曰  
朕巡幸所經見敖漢及柰曼諸部田土甚嘉百穀可種如種穀多穫則興安嶺  
左右無地可耕之人就近質糶不須入邊市米矣其向因種穀之地不可牧馬  
未曾墾耕者今酌留草茂之處爲牧地自兩不相妨且敖漢柰曼蒙古以捕魚  
爲業者衆教之以引水灌田彼亦易從凡有利益於蒙古者與王台吉等相商  
而行雍正五年以所部失賜帑賑之九年隨大軍勦噶爾丹策凌所部一旗駐  
固爾班圖爾噶山與柰曼翁牛特巴林扎噶特喀爾喀左翼阿噶科爾沁諸部  
統盟于昭烏達爾五扎薩克多羅郡王一附多羅郡王一附固山貝子二一由  
貝勒降襲鎮國公一由貝子降襲是旗繫事最在先嘉慶以後屢申嚴禁光緒  
十七年金丹道匪楊悅春等糾衆爲亂十月攻貝子德克沁府踞之戕德克沁  
四出紛擾喀喇沁土默特翁牛特柰曼諸部皆被兵脅漢人爲匪遇蒙人則殺  
估官署燬教堂蹂躪甚慘命直隸提督葉志超等勦之至十二月始平詔賑恤



之凡赦漢等五部八旗爲銀十七萬兩有奇全濟民蒙三十萬口有奇李鴻章會都統奎斌奏蒙古客民結怨已深一在佃種之交租一在商賈之積欠應更定新章佃種蒙地者山地方官征收蒙古王公派員領取商民領取蒙古資本貿易或彼此除欠致有虧折亦應送地方官持平論斷毋稍偏倚此赦漢諸部蒙古客民結隙根本所在故鴻章等欲更張救之二十四年札薩克郡王達木林達爾達克以充昭烏達盟長撥累屬下違例科派奪盟長及札薩克三十一年札薩克郡王勒恩扎勒諾爾贊復被護衛刺死三十三年都統廷杰以置嗣未定請理藩院慎擇親賢速爲承襲宣統元年以族人棍布札布襲二年分置左右二旗以原有札薩克者爲左旗別授郡王色凌端噶布爲右旗札薩克左旗有佐領三十五右旗有佐領二十

奈曼部在喜峯口外至京師千有百一十里東西距九十五里南北距二百二十里東喀爾喀左翼西赦漢南土默特北翁牛特元太祖嘗借弟哈布圖哈薩爾平奈曼部三傳至額森偉徵諾顏卽以爲所部號子貸楚克圖稱巴圖魯台

吉服屬於察哈爾以林丹汗不道天聰元年借從子鄂齊爾等率屬來歸詔還舊牧鄂齊爾以卒巡徼斬察哈爾兵百稜牲畜百餘獻賜號和碩齊賚甲一八年遣大臣赴碩翁科爾定諸藩牧以巴克阿爾和碩巴噶什魯蘇台爲柰曼界崇德元年授扎薩克爵多羅達爾漢郡王先是所部阿邦和碩齊從大軍勦茂明安部逃賊有功至是以宣諭朝鮮袁楚克遣屬岱都齊齋書從遇明皮島兵阻擊之斬賊二被創還悉蒙獎賚五年遣屬扎丹隨大軍征索倫凱旋得優賜七年復遣屬善丹薩爾圖隨征明由黃崖口入邊下薊州趨山東攻克兗州八年善丹來獻俘賜宴順治元年從入山海關擊流賊李自成康熙十四年察哈爾布爾尼叛扎薩克郡王扎木三應之徒察罕郭勒與布爾尼賊壘聯聲援且遣黨煽諸扎薩克詔撫遠大將軍信郡王鄂扎率師討至達祿布爾尼敗遁爲科爾沁額駙沙津陣斬扎木三蹙縛乞罪特旨貸死更優獎不阿逆諸台吉鄂齊爾山一等台吉襲扎薩克郡王爵烏勒木濟由二等台吉晉貝子格喀爾由二等台吉晉輔國公烏爾圖納素圖由三等台吉晉一等台吉鄂齊爾長子額

爾德尼授三等台吉二十年詔發喜峯口倉粟賑所屬貧戶雍正五年所部歉收賜帑賑之九年隨大軍勦噶爾丹策凌初柰曼與敖漢逢國家典禮及征伐事先後偕來位秩如一獨扎木三懷貳遂不齒於敖漢迨鄂齊爾重膺錫封奉職惟謹而荷恩亦如故焉所部一旗駐彰武臺其爵爲扎薩克多羅達爾漢郡王道光二十七年以壽安固倫公主指配柰曼扎薩克郡王阿完都窪第扎布之子德木楚克扎布授固倫額駙旋襲爵職同治四年卒追賜親王銜光緒十七年金丹道匪之變是部亦被擾事平賑恤之有佐領五十

巴林部在古北口外至京師九百六十里東西距二百五十一里南北距二百三十三里東阿嚕科爾沁西克什克騰南翁牛特北烏珠穆沁元太祖十六世孫阿爾楚博羅特生和爾朔齊哈薩爾子蘇巴海稱達爾漢諾顏號所部曰巴林子巴噶巴圖爾嗣有子三長額布格岱洪巴圖魯次和托果爾昂哈次色特爾初皆服屬於喀爾喀天命四年額布格岱洪巴圖魯偕喀爾喀部長遣使乞盟允之十一年春以背盟私與明和大軍往討陣斬台吉囊努克冬討扎嚕特

詔分軍入部境以張兵勢焚原驅哨而還會察哈爾林丹汗掠其諸部台吉皆奔依科爾沁天聰二年色特爾率子色布騰及額布格岱洪巴圖魯子色稜和託果爾昂哈子滿珠習禮等自科爾沁來歸優資撫輯之三年從征明由養息穆河入大安口克遵化四年攻昌黎與扎噶特兵圍城北六年從略大同宣府邊八年五月會兵扎木哈克征察哈爾賜宰桑布兌山津雕鞍良馬遂由獨石口征明朔州克堡八月遣大臣赴碩翁科爾定諸藩收以扈拉琉璃呼布里都克哩葉哈達瑚濟爾阿達克爲巴林界崇德元年選兵從征明三年自牆子嶺入明邊樹雲梯攻城台吉阿玉什屬索爾古先登克之四年圍錦州六年圍松山七年獻俘資將弁幣順治元年從入山海關擊流賊李自成五年詔編所部佐領以滿珠習禮掌左翼爵固山貝子色布騰掌右翼爵多羅郡王各授扎薩克康熙二十三年上辛塞外駐蹕烏拉岱兩翼扎薩克率諸台吉來朝賜冠服弓矢銀幣有差二十八年詔發古北口倉粟賑所屬貧戶二十九年命額駙阿喇布坦率兩翼兵四百赴胡蘆郭勒偵噶勒丹是役也色布騰子格喀爾圖

納木扎孫納木達克桑哩達烏爾袞暨族台吉沙克塔爾等皆從格喀爾圖尤  
衝鋒奮擊師旋得優資三十四年以噶勒丹掠喀爾喀至巴顏烏蘭詔檄敖漢  
忒曼兵赴阿喇布坦軍并命納木達克烏爾袞等防烏珠穆沁汛是年所部款  
收詔發坡賴村米賑之三十八年命護軍統領鄂克濟哈學士蘇赫納往會扎  
薩克等將現貯巴林米千石散賑若人衆米寡再運坡賴米賑給雍正九年隨  
大軍勦噶勒丹策凌二等台吉璘瞻追賊察巴罕河護駝馬又擊之於塔爾勒  
圖固爾班什勒諸處叙功晉授一等台吉所部二旗右翼駐托鉢山左翼駐阿  
察圖拖羅海爵四親王品級札薩克多羅郡王一札薩克固山貝子一附固山  
貝子二光緒十七年金丹道匪之變賊渠李國珍擾至是部那林溝地葉志超  
遣軍擊平之三十二年以是部墾地置林西縣隸赤峯直隸州左翼有佐領十  
六右翼有佐領二十六

札噶特部在喜峯口外至京師千五百一十里東西距百二十五里南北距四  
百六十里東科爾沁西界阿噶科爾沁南喀爾喀左翼北烏珠穆沁元太祖十

八世孫烏巴什稱偉微諾顏號所部曰札噶特二子長巴顏達爾伊勒登次都喇勒諾顏巴顏達爾伊勒登子五長忠圖傅子內齊相繼稱汗次庶根次忠嫩次果弼爾圖次昂安都喇勒諾顏子二長色本次瑪尼初皆服屬於喀爾喀太祖高皇帝甲寅年內齊以其妹歸我貝勒莽古爾泰忠嫩及從弟額爾濟格亦來締姻天命四年秋大軍征明鐵嶺從色本借從兄巴克等隨喀爾喀台吉宰賽以兵萬餘助明爲我軍陣擒冬內齊額爾濟格額騰鄂爾齊圖多爾濟桑阿爾齊弼登圖借喀爾卓哩克圖洪巴圖魯等遣使乞盟許之遣大臣往莅盟其宰桑扣肯屬有來奔者上以盟不可渝拒弗納旋釋色本巴克歸八年巴克來朝命釋其質子鄂齊爾桑與俱歸而忠喇昂安等屢以兵掠我使齋往科爾沁之服物及馬牛上遣軍征之斬昂安俘其衆忠嫩子桑圖以孥被擒來朝乞哀詔歸令完聚未幾所部諸台吉復背盟襲我使固什於漠察喇及遼河畔掠財物十一年命大貝勒代善率師往討斬鄂爾齊圖擒巴克等凡十四台吉師還仍詔釋歸尋爲察哈爾林丹汗所掠往依科爾沁天聰二年內齊色本等先後

率屬來歸台吉喀巴海殺察哈爾台吉噶爾圖以俘七百獻賜號偉徵三年奉  
敕定隨征軍令以廠越界駐牧自議罪內齊色本瑪尼及果弼爾圖巴雅爾圖  
岱青請各罰駝十馬百詔寬之各罰馬一是年冬隨征明入龍井關克遵化圍  
其郡明兵屯城東蒙古諸部不俟整隊驟進失利惟色本及瑪尼敗敵得優賚  
五年春詔議台吉岱青罪先是大貝勒代善陣擒岱青子善都往奔科爾沁越  
二年歸詔留贍養嗣從大軍征明貝勒莽古爾泰與明兵戰都城東岱青善都  
遁走又誣計貝勒阿濟格縱屬殺人至是論罪應斬上特宥之奪所屬人戶分  
給莽古爾泰阿濟格六年內齊色本瑪尼喀巴海等從征察哈爾圖獎其實心  
效力尋隨貝勒阿濟格略明大同宣府邊八年由獨石口進攻朔州是年冬遣  
大臣赴碩翁科爾定諸藩牧以諾綿多爾多布圖烏魯木爲札嚕特界崇德二  
年由朝鮮進征瓦爾喀三年隨征喀爾喀札薩克圖汗五年春從征索倫賜台  
吉桑古爾及阿玉什號賴阿爾蘇瑚岳博果等蟒服貂裘甲冑弓矢冬以台吉  
肯哲赫追擒茂明安逃人功賜號達爾漢順治元年從入山海關擊流賊李自

成五年詔編所部佐領時內齊色本卒以內齊子尙嘉布掌左翼色本子桑噶爾掌右翼各授扎薩克貝勒康熙十四年察哈爾布爾尼叛且陰煽諸部二等台吉根翼什希布以不附逆封鎮國公後停襲二十九年隨大軍征噶爾丹二等台吉科克晉四等台吉袞楚克色爾濟額爾德尼陣沒俱贈一等台吉賜號達爾漢雍正元年所部歉收詔發帑賑之十一年選兵隨勦噶爾丹策凌隸敖漢台吉羅卜藏軍所部二旗左翼駐齊齊靈花拖羅海山北右翼駐圖爾山南爵四扎薩克多羅貝勒一扎薩克多羅達爾漢貝勒一附鎮國公一輔國公一是部產蠶初禁開取光緒二十一年都統松壽以部議主開奏定納課章程由各旗選派公正蒙員試辦三十三年都統廷杰奏以是部及阿噶科爾沁墾地置開魯縣隸赤峯直隸州是部左右翼旗各有佐領十六

阿噶科爾沁部在古北口外至京師千三百四十里東西距百三十里南北距四百二十里東扎噶特西巴林南喀爾喀左翼北烏珠穆沁元太祖弟哈巴圖哈薩爾十三傳至圖美尼雅哈齊子三長奎蒙克塔斯哈喇遊牧嫩江號嫩科



爾沁次巴貸諾顏次布爾海遊牧呼倫貝爾巴貸諾顏子三長昆都倫岱青號所部曰阿嚕科爾沁以別於嫩科爾沁子達賚稱楚琥爾嗣爲部長次哈貝巴圖爾裔不著次諾顏秦子四號四子部落布爾海裔號烏喇特詳各部傳阿嚕科爾沁與四子部落烏喇特茂明安翁牛特阿巴噶阿巴哈納爾及喀爾喀內外扎薩克統號阿嚕蒙古初皆服屬於察哈爾以林丹汗不道天聰四年達賚暨子穆彰率屬來歸命諸貝勒郊迎五里賜宴八年遣大臣赴碩翁科爾定諸藩牧以兩白旗外塔拉布拉克遜烏爲其部界崇德元年宣諭朝鮮其部德赫拜達爾齋書從遇明皮烏兵阻擊敗之還得優賚先是阿嚕科爾沁設兩旗達賚穆彰各領一至是始併兩旗爲一以穆彰領之嗣從征朝鮮瓦爾喀索倫喀爾喀及明濟南錦州松山薊州順治元年從入山海關擊流賊李自成敍功授扎薩克爵固山貝子康熙二十七年噶爾丹侵略喀爾喀諭所部兵防蘇尼特汛二十八年部衆乏食賜粟賑之二十九年二等台吉棟紐特從征噶爾丹見賊勢熾慷慨謂衆曰我等受恩深若稍退何面目見聖顏乎率兵三百趨前戰皆

沒三十年贈一等台吉世襲達爾漢號是冬理藩院議給所部貧戶米穀諭曰  
官給米穀應調蒙古駝馬運送時值隆冬輪輓殊艱恐領米之人不能運到必  
致沿邊私糶不如量米給銀到彼甚易貧人得濟實惠三十五年上親征噶爾  
丹偵賊沿克噶倫河至額哲特岡哈布齊爾地諭嚴防汛界四十三年遣大臣  
往汛盜案宣諭扎薩克戢所部務令無盜四十八年固山額駙巴特瑪妻縣君  
以屬人不遵令請獻戶口諭暫遣官理後不爲例雍正五年賜所部貧戶銀九  
年從大軍勦噶爾丹策凌十三年遣官齎銀賑饑所部一旗駐牧瑯岡山東隸  
昭烏達盟其爵爲扎薩克多羅貝勒由固山貝子晉襲是部亦產麟光緒三十  
一年定蒙員自辦納課章程是部一旗有佐領五十

翁牛特部在古北口外至京師七百六十里東西距三百里南北距百六十里  
東阿喀科爾沁西承德府南喀喇沁及敖漢北巴林及克什克騰元太祖弟諤  
楚因稱烏真諾顏其裔蒙克察罕諾顏有子二長巴延岱洪果爾諾顏號所部  
曰翁牛特次巴泰車臣諾顏別號喀喇齊哩克部皆稱阿喀蒙古巴顏岱洪果

爾諾顏再傳至圖蘭號杜稜汗子七長遜杜稜次阿巴噶圖拜台吉次棟岱青次班第偉徵次達拉海諾木齊次薩揚學爾根次本巴楚琿爾巴泰車臣諾顏三傳至努綏子二長噶爾瑪次諾密泰岱青皆初服屬於察哈爾以林丹汗不道天聰六年遜杜稜棟岱青噶喇齊哩克台吉噶爾瑪率屬來歸是年上親征察哈爾各選兵從林丹汗遁復從貝勒阿濟格赴大同宣府收察哈爾部衆之竄入明邊者師旋優養遣歸自是其部稱翁牛特以喀喇齊哩克附之不復寇阿噶岱稱七年春棟岱青噶爾瑪來朝班第偉徵等相繼獻駝馬冬遜杜稜復率衆來朝八年遣大臣赴碩翁科爾定諸藩牧以扈拉瑚噶呼布哩都爲翁牛特部界是冬班第偉徵達拉海諾木齊以越界游牧罪議罰駝百馬千詔從寬罰十之一復以罰奈曼部駝馬命分給遜杜稜棟岱青崇德元年詔編新部佐領以遜杜稜掌右翼爵多羅杜稜郡王棟岱青掌左翼子多羅達爾漢岱青各授扎薩克三年喀爾喀扎薩克圖汗擁衆僞歸化城上親征之棟岱青班第偉徵達拉海諾木齊等以兵會偵扎薩克圖汗遁乃還四年棟岱青率宰桑烏

巴什和尼齊等從大軍征明六年圍錦州松山設伏高牆大路及桑阿爾齊堡  
遇杏山逃卒追擊之斬獲甚衆七年叙功賜棟岱青噶爾瑪和尼齊等布幣有  
差復追議松山掘壕時宰桑烏巴什以誦經故不親督兵及暮又失守望罪論  
死詔宥之達拉海諾木齊及絳克圖巴木布等復從貝勒阿巴泰征明八年來  
獻俘賜宴順治元年從入山海關擊流賊李自成復追殺部將噶勒嘛從征明  
功賜號達爾漢康熙十五年以勦逆藩吳三桂詔選兵赴河南駐防十六年調  
荊州十八年徵還二十二年以其部多盜諭撫衆及弭盜法二十六年上閱兵  
蘆溝橋命其部來朝人從觀二十七年選兵赴蘇尼特汛防禦噶爾丹三十四  
年所部乏食遣官往賑三十五年上親征噶爾丹詔徵兵五百運中路軍給  
器糴三十六年朔漠平賀運糧兵銀五十六年理藩院奏翁牛特及克什克騰  
諸扎薩克請令公勘地址有越界伐木者論罪從之雍正五年賜銀賑所屬貧  
戶九年隨大軍勦噶爾丹策凌乾隆二十年從征達瓦齊所部二旗右翼駐英  
什爾哈齊特呼朗左翼駐扎喇峯西爵四扎薩克多羅杜稜郡王一附固山貝

子鎮國公一扎薩克多羅達爾漢岱青貝勒一光緒十七年金丹道匪之變賊渠李國珍等擾是部焚王府踞烏丹城卽元全甯路治實熱河北路門戶葉志超遣副將潘萬才等率軍先克之餘遂迎刃而解是部二旗蹂躪均重事平賑恤之左翼有佐領二十右翼有佐領三十八

克什克騰部在古北口外至京師八百有十里東西距三百三十四里南北距三百五十七里東翁牛特及巴林西浩齊特及察哈爾正藍旗牧廠南翁牛特北烏珠穆沁元太祖十六世孫鄂齊爾博羅特再傳至沙喇勒達稱墨爾根諾顏號所部曰克什克騰子達爾瑪有子三長索諾木次巴本次圖壘服屬於察哈爾天聰八年索諾木率屬來歸崇德六年台吉沙哩博羅和雲敦等奉命赴董家喜峯諸口偵明兵俘斬甚衆順治九年詔編所部佐領以索諾木領之授札薩克康熙二十六年上閱兵蘆溝橋命其部來朝人從觀二十七年噶爾丹侵略爾喀詔選兵防蘇尼特汎二十九年四等台吉穆倫噶爾弼以偵擊噶爾丹功晉一等台吉三十五上年親征噶爾丹凱旋以其部設站兵無誤驛務賚

銀幣雍正五年賜銀賑其屬貧戶所部一旗駐牧吉拉巴斯峯隸昭烏達盟其  
府爲扎薩克一等台吉是部墾事最早嘉慶中設白岔巡檢治之同治中回匪  
東竄熱河設戍其地又經棚當直隸多倫諾爾廳東北商民萃處號稱蕃盛光  
緒十七年金丹道匪之變是部曾以兵協勦烏丹城等處之匪得捷有佐領十  
喀爾喀左翼部在喜峯口外至京師千二百有十里東西距百二十五里南北  
距二百三十里東科爾沁西奈曼南土默特北扎嚕特及翁牛特元太祖十六  
世係格喀森札賚爾琿台吉居杭愛山始號喀爾喀有子七部族繁衍分東西  
中三路以三汗掌之其長子阿什海達爾漢諾顏生子二長巴顏達喇爲西路  
扎薩克圖汗祖次圖們達喇岱青子碩壘烏巴什琿台吉生子三長俄木布額  
爾德尼次杭圖岱次衮布伊勒登皆爲喀爾喀西路台吉隸扎薩克圖汗康熙  
三年衮布伊勒登以其汗旺舒克爲同族羅卜藏台吉額璘沁所戕部衆潰窮  
無依乃越瀚海來歸先是喀爾喀中路土謝圖汗下台吉本塔爾攜衆內附封  
扎薩克親王府駐牧張家口外至是詔衮布伊勒登扎薩克多羅貝勒賜牧喜

峯口外察罕和碩圖以所居地分東西故本塔爾稱喀爾喀右翼衮布伊勒登稱喀爾喀左翼蓋自國初以來喀爾喀相繼歸誠名凡三曰舊喀爾喀歸誠最早後編入蒙古八旗曰內喀爾喀卽今隸內扎薩克之喀爾喀左右翼二部曰外喀爾喀其歸誠較後卽今隸外扎薩克之喀爾喀土謝圖汗車臣汗扎薩克圖汗賽因諾顏四部二十九年以額魯特台吉噶爾丹侵喀爾喀土謝圖汗車臣圖汗扎薩克圖汗所居皆被掠先後乞降詔衮布伊勒登備兵要汛偵禦噶爾丹三十五年上由克噶倫河親征諭其部選兵赴烏勒輝聽調噶爾丹敗遁撤兵還雍正元年所屬歉收賜帑賑之九年大軍勦噶爾丹策凌選兵赴歸化城駐防尋以護外扎薩克游牧移駐克噶倫河乾隆初撤之所部一旗駐察罕和碩圖其爵爲扎薩克多羅貝勒有佐領一是部與放漢奈曼巴林翁牛特扎魯特喀爾喀左翼阿喀阿爾沁七部十一旗統盟於卓索圖道光末籌海防咸豐中勦粵匪皆徵其兵至同治初科爾沁親王僧格林沁陣亡乃徵歸清代蒙古留京王公以是盟與哲里木卓索圖爲大都額駙子孫錫林郭勒烏察布

伊克昭三盟則鮮見焉

烏珠穆沁部在古北口外至京師千一百六十三里東西距三百六十里南北距四百二十五里東索倫西浩齊特南巴林北瀚海元太祖十六世孫圖噶博羅特由杭愛山徙牧瀚海南子博第阿喇克繼之有子三分牧而處長庫登汗詳浩齊特部傳次庫克齊圖墨爾根台吉詳蘇尼特部傳次翁袞都喇爾號其部曰烏珠穆沁子五長綽克圖號巴圖爾諾顏次巴雅號賽音永圖諾顏次納延泰號伊勒登諾顏次彭錦號達爾漢諾顏皆早卒次多爾濟號車臣濟農與察哈爾同族爲所屬以林丹汗不通多爾濟借綽克圖子色稜徙牧瀚海北依喀爾喀天聰九年大軍收服察哈爾多爾濟借喀爾喀部車臣汗碩壘浩齊特部策稜伊勒登土謝圖蘇尼特部叟塞巴圖魯濟農阿巴噶部都思噶爾扎薩克圖巴圖爾濟農等表貢方物崇德元年命舊自察哈爾來歸之偉宰桑等齎敕往諭遂偕其使納木渾津等至自是貢物不絕二年八月台吉伊什喀布烏喇垓增格阿津鏗特克等來貢賽冠服甲冑弓矢布幣十一月多爾濟色稜各



率屬山克噶倫來歸三年喀爾喀扎薩克圖汗擁衆僞歸化城上統師征多爾濟色稜以兵會偵扎薩克圖汗遁乃還賜貢馬台吉巴甘冠服鞶帶五年賜來朝台吉固穆塔布囊阿哈圖等蟒服綵幣六年詔授多爾濟扎薩克和碩車臣親王順治三年詔授色稜扎薩克多羅額爾德尼貝勒以多爾濟掌左翼色稜掌右翼是年大軍勦蘇尼特部騰機思至喀爾喀以多爾濟屬達喇海嚮導功賜號達爾漢康熙二十年以所部牧鄰喀爾喀因互竊駝馬王大臣等遵旨議邊汛形勝處各屯兵百許按旗設哨嗣後扎薩克能撫衆戢盜者予敘否則論罪二十七年噶爾丹侵喀爾喀遣大臣赴烏珠穆沁宣諭扎薩克等防汛三十年阿巴噶台吉奔塔爾首烏珠穆沁台吉車根等叛附噶爾丹語涉扎薩克王素達尼妻命大臣往勘得車根等私給噶爾丹駝馬又令部校阿爾塔等往通信狀罪應死素達尼妻預知應削封號奪所屬人戶素達尼已故應除爵議上詔治車根等罪免奪人戶素達尼未預謀免除爵襲如初三十一年素達尼弟協理台吉烏達喇希妻以烏達喇希證車根等從逆狀乞予敘理藩院議烏達

喇希故應贈輔國公令子衮布扎偵襲從之後停襲三十四年噶爾丹復侵喀爾喀詔所部選兵駐汛三十五年偵噶爾丹至額哲特圖哈卜濟爾赴烏爾輝聽調是年上親征噶爾丹還賜坐塘諸弁兵銀五十五年選兵隨大軍防禦策妄阿喇布坦雍正九年議勦噶爾丹策凌詔徵烏珠穆沁西各扎薩克兵三千駐烏喇特汛防四十九旗游牧復諭烏珠穆沁別以兵駐克嚕倫河十年移駐達哩剛愛十三年徵還乾隆十二年詔嘉兩翼扎薩克值所屬災贍貧戶二萬餘王貝勒以下各賜俸半年無俸台吉俱賜幣有差所部二旗右翼駐巴克蘇爾哈臺山左翼駐魁蘇陀羅海與浩齊特蘇尼特阿巴噶阿巴哈納爾諸部統盟於錫林郭勒府四扎薩克和碩車臣親王一附鎮國公一輔國公一扎薩克多羅額爾德尼貝勒一左旅扎薩克貝勒色楞傳至達克丹都克雅扎布咸豐十年以報效軍需駝馬予郡王銜是部左翼有固爾班泊產鹽由巴林橋烏丹城運售內地西出圍場分銷承德豐灤各屬東出建平分銷建昌朝陽各屬遠者更可銷至奉天突泉諸縣西南可由多倫至山西豐鎮甯遠諸廳光緒三十

二年都統廷杰奏定試辦蒙鹽章程宣統二年度支部尙書載澤奏定山西蒙鹽辦法謂東路以烏珠穆沁蒙鹽爲主以部蘇尼特鹽坳之左翼有佐領二十一右翼有佐領九

浩齊特部在獨石口外至京師千八百一十五里東西距百七十里南北距三百七十五里東及北烏珠穆沁西阿巴噶南克什克騰元太祖十六世孫圖噶博羅特再傳至庫登汗號其部曰浩齊特庫登汗孫德格類號額爾德尼瑯台吉子五長奇塔特扎幹杜稜土謝圖次巴斯琿土謝圖次策凌伊勒登土謝圖次奇塔特昆杜稜額爾德尼車臣楚琥爾次茂海墨爾根與察哈爾同族爲所屬以林丹汗不道徙牧瀚海北依喀爾喀天聰八年所部台吉額琳臣及塔布囊巴特瑪班第圖噶齊宰桑僧格布延徹臣烏巴什等攜戶口駝馬自喀爾喀內附遣使迎宴賚甲冑雕鞍蟒服銀幣額琳臣屬有先附者五十三戶仍命轄之九年大軍收服察哈爾策凌伊勒登土謝圖借烏珠穆沁諸部長表貢方物崇德元年巴斯琿土謝圖借蘇尼特部來貢二年奇塔特昆杜稜額爾德尼車

臣楚琥爾子博羅特率屬來歸順治三年詔授扎薩克多羅額爾德尼貝勒後晉封郡王八年奇塔特扎幹杜稜土謝圖子噶爾瑪色旺携衆至十年詔授扎薩克多羅郡王以博羅特掌左翼噶爾瑪色旺掌右翼康熙二十七年詔發拜察儲粟賑其部貧戶復命給銀三十四年噶爾丹侵略爾喀詔兩翼扎薩克選兵駐黑偵禦之三十五上親征噶爾丹牧馬郭和蘇台諭借蘇尼特阿巴哈納爾部長董牧務凱旋兩翼扎薩克率台吉等歡迎道左諭獎飼秣得宜並優資監牧及修道鑿井諸弁兵五十四所部歉收以唐三營儲粟賑之並遣官往教之漁雍正九年大軍勦噶爾丹策凌詔選兵分駐克嚕倫河十年移駐達哩剛愛十三年撤還所部二旗左翼駐特古哩克呼都克瑚欽右翼駐烏默赫塞哩隸錫林郭勒盟爵二扎薩克多羅額爾德尼郡王一扎薩克多羅郡王一是一部左右翼有佐領各五

蘇尼特部在張家口外至京師九百六十里東西距四百六里南北距五百八十里東阿巴噶西四子部落南察哈爾正藍旗牧廠北瀚海元太祖十六世孫

圖喀博羅特再傳至庫克齊圖墨爾根台吉號其部曰蘇尼特庫克齊圖墨爾根台吉子四長布延球台吉子綽爾賓尼蘇尼特西路次布爾海楚琥爾子塔巴海達爾漢和碩齊居蘇尼特東路初皆服屬於察哈爾以林丹汗不道徙牧齊海北依喀爾喀天聰九年綽爾賓子叟塞偕喀爾喀車臣汗碩壘遣使貢方物崇德二年塔巴海達爾漢和碩齊子騰機思騰機特莽古岱哈爾呼喇偕台吉偉徵等各遣使來朝賜朝鮮貢物三年台吉務善伊勒登多爾濟喀喇巴圖魯色稜達爾瑪等從征喀爾喀扎薩克圖汗偵遁仍還四年春台吉超察海噶爾楚爾古特卓特巴什達喇莽古思鄂爾濟巴圖爾額思赫爾僧特等來朝登冠服甲冑弓矢冬騰機思叟塞各率屬自喀爾喀來歸入覲獻駝馬五年正月賜叟塞騰機思騰機特莽古岱哈爾呼喇及台吉佈達什希布阿玉什噶爾瑪色稜額爾克辰寶茂海伊勒畢斯等甲冑銀幣十月台吉烏班岱棟果爾鄂爾齊博希沙律等來貢馬寶冠服鞍轡六年授騰機思扎薩克多羅郡王七年授叟塞扎薩克多羅杜稜郡王以騰機思掌左翼叟塞掌右翼順治三年騰機思

以車臣汗碩壘誘叛率弟騰機特及台吉烏班岱多爾濟斯喀等逃喀爾喀上  
遣師偕外藩軍由克喀倫追勦至誇特克山及圖拉河騰機思騰機特遁獲其  
孛烏班岱多爾濟斯喀爲四子部落軍陣斬師旋以烏班岱從子託濟弗從叛  
且隨勦賜所俘五年騰機思及騰機特悔罪乞降詔宥死仍襲爵如初康熙十  
年所部歉收詔發宣化府及歸化城賑粟儲之復酌給馬牛羊二十年遣官察  
給兩翼災戶銀米二十七年噶爾丹侵喀爾喀詔選兵二千防汛二十九年噶  
爾丹襲喀爾喀昆都倫博碩克圖袞布詔新部王以下願効力者赴軍聽用尋  
噶爾丹入烏珠穆沁界諭還駐本旗要汛三十五年上親征噶爾丹詔選兵赴  
烏勒輝聽調以牧馬郭和蘇臺偕活齊特阿巴噶阿巴哈納爾部長董牧務凱  
旋諭獎飼牧得宜並優資監牧及修道鑿井諸弁兵以右翼扎薩克屬旺舒克  
左翼扎薩克屬博羅扎布嚮導功賜號達爾漢復詔郡王薩穆扎之第三子多  
爾濟思喀布貝勒博木布之長子素岱會師圖拉河緝噶爾丹尋分右翼兵赴  
珠勒輝克爾阿濟爾罕左翼兵赴伊察扎罕以不見賊蹤徹還五十四年災詔

發張家口儲粟並帑十萬自台吉下六萬四千九百餘丁徧贍之雍正元年右翼二等台吉進達克以追捕叛賊遇害晉贈一等台吉命視公爵致祭子三長噶爾瑪遜多布封輔國公次噶爾瑪策布騰次恭格垂穆不勒以隨捕賊功各晉台吉秩有差噶爾瑪遜多布爵後停襲二年所部災賜銀賑之九年調兵屯克噶倫河防禦噶爾丹策凌十年有奏商都達布遜諾爾牧廠應移蘇尼特汛者上飭止之令各居其牧十二年所部兵駐防達哩剛愛十三年徹還乾隆十二年以災告飢遣官往賑所部二旗左翼駐和林圖察伯台岡右翼駐薩敏西勒山隸錫林郭勒盟附四札薩克多羅郡王一附多羅貝勒一札薩克多羅杜稜郡王一附輔國公一由貝勒降襲洎五十六年以是部連年被旱又特賑之道光十三年右翼郡王與喀爾喀親王爭界詔察哈爾都統凱音布往勘尋以喀爾喀災緩之其地當漠南北之衝歷代由漠南用兵漠北者多出其途光緒末于蘇尼特右翼王府東北七十里置電報局曰滂江以通烏得叻林之電是部亦產鹽西南行銷山西豐甯諸廳左翼有佐領二十右翼有佐領十三

阿巴噶部在張家口外至京師千里東西距二百里南北距二百有十里東阿巴哈納爾西蘇尼特南察哈爾正藍旗牧廠北瀚海元太祖弟布格博勒格圖十七傳至巴雅思瑚布爾古特子二長塔爾尼庫同號所部曰阿巴噶塔爾尼庫同子二長素僧克偉徵子額爾德尼圖捫號扎薩克圖諾顏次揚古岱卓哩克圖子多爾濟號額齊格諾顏初稱阿噶蒙古服屬於察哈爾以林丹汗不道徒牧瀚海北克噶倫河界依喀爾喀車臣汗碩壘天聰二年偕喀喇沁土默特鄂爾多斯諸部長擊察哈爾衆四萬於土默特之趙城復約喀爾喀偕喀喇沁乞師問察哈爾明年台吉奇塔特楚琥爾攜衆五百內附九年大軍收服察哈爾額爾德尼圖捫孫都思噶爾等附車臣汗碩壘表貢方物崇德四年額齊格諾顏多爾濟自喀爾喀來歸時有同名多爾濟者號達爾漢諾顏率衆皆至六年詔授額齊格諾顏多爾濟爲扎薩克多羅卓哩克圖郡王順治八年都思噶爾自喀爾喀來歸詔授扎薩克多羅郡王以多爾濟掌左翼都思噶爾掌右翼遣官定牧地康熙六年阿巴哈納爾部乞降以阿巴噶牧地賜之遣官視浩



齊特蘇尼特界外水草豐美地指給阿巴噶移牧二十九年噶爾丹侵略喀  
詔所部王以下願效力者赴軍聽用復諭借阿巴哈納爾供軍糈兼防新降喀  
爾喀掠諸內扎薩克牧產三十一年以台吉班第額爾德尼岱青根敦巴雅爾  
納木塔爾扎木素齊達什等導烏梁海衆內附均授二等台吉三十五上年親  
征噶爾丹牧馬郭和蘇台諭借浩齊特蘇尼特阿巴哈納爾諸部長董牧務凱  
旋諭獎餉牧得宜並優資監牧及修道鑿井諸弁兵復以所部達濟桑阿嚮導  
功賜號達爾漢三十六年王貝子台吉等朝正請備馬從軍慰令各歸所部時  
有二等台吉圖把扎布色臣楚琥爾者年八十八諭嘉其舊志報效優資之五  
十四年以災歉收詔發唐三營儲災賑之復賜無產台吉牧牲雍正二年遣官  
齎銀賑所部貧戶九年大軍勦噶爾丹策凌徵兵駐達哩剛愛十三年徹爾乾  
隆十一年旱災賑之五十四年札薩克卓里克圖郡王喇特納什第以事奪札  
薩克予其弟巴勒丹僧格一等台吉札薩克所部二旗左翼駐科布爾塞哩右  
翼駐巴顏額倫爵五扎薩克多羅郡王一扎薩克一等台吉一附多羅卓里克

圖郡王一固山達爾漢貝子一輔國達爾漢公一由貝子降襲右翼扎薩克巴勒丹僧格三傳至杜噶爾布木成豐七年以報効軍需予鎮國公銜是部左右翼有佐領各十一

阿巴給納爾部在張家口外至京師千五十里東西距百八十里南北距四百三十六里東活齊特西阿巴噶南察哈爾正藍旗牧廠北瀚海元太祖弟布格博勒格圖十八傳至諾密特默克圖號所部曰阿巴哈納爾再傳至多爾濟伊勒登子二長色稜墨爾根次棟伊思喇布初補阿喀蒙古依喀爾喀車臣汗碩壘駐牧克噶倫河界其地在瀚海北崇德七年有和碩泰者台吉達喇務巴三察屬也攜帑內附嗣托克托伊達噶噶達賴等至皆優養之康熙元年台吉阿喇納噶爾堪宰桑固英等越瀚海南牧神諾陀羅海近內汛三年色稜墨爾根復如之守臣以聞上知爲喀爾喀所脅宥罪遣歸因諭喀爾喀以噶爾拜瀚海爲牧界繼此有越者留勿道四年喀爾喀復違諭令阿巴哈納爾諸台吉牧瀚海南棟伊思喇布弗之從尋偕台吉阿喇納噶爾堪等率衆來歸詔授札薩克

固山貝子阿喇納噶爾瑪以各摺丁七百餘均授一等台吉五色稜墨爾根亦來歸六年詔授札薩克多羅貝勒道官指示阿巴噶部移牧他所以舊牧地給阿巴哈納爾色稜墨爾根掌左翼棟伊思喇布掌右翼二十七年噶爾丹侵喀爾喀哲卜尊丹巴呼圖克圖奔赴內汛所部班第岱青車凌岱青奉詔督兵二百往護復選兵千三百由瀚海偵噶爾丹先是色稜墨爾根棟伊思喇布來歸阿巴哈納爾諸台吉有留居喀爾喀者至是隨哲卜尊丹巴呼圖克圖額爾德尼台吉納木扎勒等至曰根敦額爾克曰阿海烏巴什曰伊克岱青曰額爾克烏巴什挈屬戶千餘詔納之二十九年噶爾丹復侵喀爾喀至烏勒札河所部選兵四千從大軍迎擊復以所部索諾木伊喇圖嚮導功賜號達爾漢五十四年以災歉收詔發唐三營儲粟賑之復賜無產台吉牲牧雍正二年遣官齎銀賑所部貧戶九年大軍勦噶爾丹策凌檄兵駐達哩剛愛十三年撤還所部二旗右翼駐昌圖山左翼駐烏勒扈陀羅海府二札薩克多羅貝勒一扎薩克固山貝子一札薩克貝子棟伊思喇布十傳至車林多爾濟宣統元年以報效

軍需賜郡王銜世襲貝勒左翼有佐領九右翼有佐領七是部與烏珠穆沁浩齊特蘇尼特阿巴噶四部合爲十旗統盟於錫林郭勒於內札薩克東四盟中距京稍遠風氣獨守舊迄清季無招墜之事察哈爾都統行文令辦新政其盟覆文頗不遜咸豐中嘗徵其兵備防旋以不得力撤之同治中以回匪東竄徵其盟駝隻濟軍

藩部三

四子部落

茂明安

喀爾喀右翼

烏拉特

鄂爾多斯

阿拉善

額濟納

四子部落在張家口外至京師九百六十里東西距二百三十五里南北距二百四十里東及北蘇尼特西歸化城土默特南察哈爾鑲紅旗牧廠元太祖弟哈巴圖哈薩爾十五世孫諾延泰與其兄昆都倫岱青遊牧呼倫貝爾均稱阿喚蒙古昆都倫岱青裔詳阿嚕科爾沁部傳諾延泰子西長僧格號墨爾根和碩齊次索諾木號達爾漢台吉次鄂木佈號布庫台吉次伊爾扎木號墨爾根台吉四子分牧而處後遂爲其部稱天聰四年阿嚕諸部長內附伊爾扎木來獻駝馬貂皮賜宴命坐大貝勒代善右以優異之五年僧格從征明大凌河敗

錦州援兵獻俘百餘賜酒勞飲給陣獲甲仗六年僧格從征察哈爾七年索諾木鄂木佈伊爾扎木相繼獻駝馬寶甲胄雕鞍鞵帶及幣八年鄂木佈伊爾扎木復獻駝馬命諸貝勒以次宴之尋遣大臣赴碩翁科爾定諸藩牧以都木達都騰格里克鄂多爾台爲其部牧界九年夏伊爾扎木隨大軍收察哈爾汗子額哲盡降其衆冬獻駝馬貂皮崇德元年宣諭朝鮮其部伊爾遜德齋書從遇明皮島兵擊斬二人還得優賚是年授鄂木佈扎薩克俾統四子部落三年伊爾扎木從征明山東四年從征松山師旋以前遣兵不及額又弗朝正議奪所屬人戶詔從寬罰牲畜五年來朝賚甲胄弓矢綵幣六年上親征明圍松山其部將都爾拜隨大軍設伏高橋及桑阿爾齋堡追杏山逃卒獲之順治元年從入山海關擊流賊李自成六年四月追叙所屬昂安導鄂木佈等來歸功予世職康熙十年所部歉收詔以宣府及歸化城儲粟賑之十三年調兵協勦陝西叛賊王輔臣諭嘉其聞命卽赴十四年山齊夏進勦尋分防太原大同十五年調赴河南聽江西大軍檄勦逆藩吳三桂十七年以厄魯特額爾德尼和碩齊

等掠烏喇特牧諭嚴防汛二十一年詔發大同宣府儲粟賑所屬貧戶復以察哈爾牧產贖之二十九年選兵赴圖拉河偵噶爾丹會噶爾丹由喀爾喀河追襲昆都倫博傾克圖袞布詔移兵駐歸化城尋徵還二十四年諭備兵聽西路軍調三十五年隨大將軍費揚古敗噶爾丹於昭莫多復簡兵百與茂明安兵百防喀爾喀親王善巴汎三十六年朔漠平賜從征及坐塘監牧諸弁兵銀雍正九年從勦噶爾丹策凌乾隆十一年賑是部災十八年議勦達瓦齊詔購駝馬送軍所部一旗駐烏爾碩爾濟坡其爵爲扎薩克多羅達爾漢卓哩克圖郡王同治中以回匪東竄命副都統杜嘎爾軍擇駐其地以當漠南北之衝徵駝馬備防戍襄臺差皆較他部爲亟光緒十一年察哈爾都統紹祺以勘土默特達拉特爭界事經其部奏四子王旗幫台駝馬自同治年間藉詞西北軍興差役繁重潛自回旗至今十餘年之久屢催罔應所屬部落聞私墾者十已七八請下理藩院嚴催詔從之二十六年拳教相仇是部釀禍頗鉅事定議給教堂賠款銀十一萬兩二十九年置山西武川廳同知以是部及茂明安喀爾喀右

翼寄居人民村落隸之自回匪平山西大同鎮練軍駐其地設防卡其後綏遠城將軍督辦墾務貽殺屢奏請飭認墾三十一年是部呈因債作抵之忽濟爾圖地一段請由官局放墾三十二年呈所部之察罕依嚕格勒圖地段認墾有佐領二十是部與茂明安喀爾喀右翼烏拉特同盟于烏蘭察布綏遠城將軍節制烏蘭察布伊克昭二盟故重大事件皆由將軍專奏焉

茂明安部在張家口外至京師千二百四十里東西距百里南北距百九十里東喀爾喀右翼西烏喇特南歸化城土默特北瀚海元太祖弟哈巴圖哈薩爾十三世孫鄂爾圖肅布延圖子錫喇奇塔特號土謝圖汗有子三長多爾濟次固穆巴圖魯次桑阿爾濟洪果爾游牧呼倫貝爾均稱阿魯蒙古多爾濟號布顏圖汗子車根圖爲茂明安部長天聰七年偕固倫巴圖魯暨台吉達爾瑪岱袞烏巴什等攜戶千餘來歸獻駝馬八年台吉揚固海杜凌烏巴海達爾漢巴圖魯瑚稜都喇勒巴堪額爾忻岱青阿布泰繼至均賜宴資甲冑雕鞍銀幣九年烏巴海達爾漢巴圖魯都喇勒叛逃喀爾喀遣兵由鄂諾河往勦至阿古庫



克特勒斬叛屬千餘追至喀木尼哈盡俘以還崇德三年巴特瑪瑚稜等從征喀爾喀扎薩克圖汗偵遁乃還嗣征明山東及蘇尼特喀爾喀皆以兵從康熙三年授車根長子僧格扎薩克俾統其衆十三年調兵勦陝西叛鎮王輔臣十四年駐防大同十五年調赴河南聽江西大軍檄勦逆藩吳三桂十九年以厄魯特羅卜藏丹台吉等掠其部牧產遣官諭厄魯特察歸所掠二十七年噶爾丹侵喀爾喀諭嚴防汛二十九年噶爾丹襲喀爾喀昆都倫博碩克圖貸布踰烏勒扎河詔選兵駐歸化城三十五年從西路大軍擊噶爾丹三十六年朔漠平賜從征弁兵銀五十四年所部收以呼坦和儲粟賑之雍正九年從勦噶爾丹策凌分兵赴岡爾班賽堪駐防十年移駐伯格爾十三年撤還所部一旗駐牧徹特塞哩隸烏蘭察木盟爵二札薩克一等台吉一附多羅貝勒一道光十二年與土默特爭界命松筠往勘八月覆奏茂明安及達爾漢貝勒等所爭土默特游牧有乾隆年間原案原圖並所設封堆鄂博向該台吉等逐加指示心俱輸服令按舊定界址各守游牧毋相侵越同治中回匪東竄是部被擾九

年十二月綏遠城將軍定安奏獲茂明安等旗肆掠馬賊巴噶安爾等誅之十年茂明安扎薩克綽克巴達爾疏等以違悞台站議處是年肅州回匪東竄烏拉特境定安遣侍衛成山統吉林馬隊駐是部光緒末綏遠城將軍貽穀督墾勸諭報地三十三年呈交水壕帳房塔兩處地段認墾實則是部租給商民墾地頗多境內漢民村落亦衆有佐領四

喀爾喀右翼部在張家口外至京師千一百三十里東西距百二十里南北距百三十里東四子部落西茂明安南歸化城土默特北瀚海元太祖十六世孫格喀森扎扎賚爾珙台吉有子七號喀爾喀七旗分東西中三路以三汗掌之其第三子諾諾和偉徵諾顏有子二長阿巴泰號鄂齊賴賽因汗爲中路土謝圖汗祖次阿布號墨爾根諾顏子三長昂噶海襲父墨爾根號次喇瑚里號達賴諾顏生本塔爾本巴什希色爾濟扎木素額璘沁次圖蒙肯號昆都倫諾楞子車顏都朗生袁布皆爲喀爾喀中路台吉綠土謝圖汗順治十年二月本塔爾以與土謝圖汗袁布隙偕弟本巴什希扎木素額璘沁及袁布率戶千餘

來歸色爾濟獨留喀爾喀其孫禮塔爾後來歸授扎薩克台吉見土謝圖汗部傳三月詔封本塔爾爲扎薩克和碩達爾漢親王統其衆賜牧塔噶渾河與內扎薩克諸部列是爲喀爾喀右翼其稱左翼者爲貝勒衮布伊勒登亦自喀爾喀來歸受封在本塔爾後互見其傳康熙二十五年喀爾喀扎薩克圖汗沙喇與土謝圖汗察理多爾濟構竄遣大臣莅盟於庫倫伯勒齊爾由歸化城齎糧往詔所部扎薩克選駝助運二十七年選兵駐邊偵噶爾丹二十九年調赴圖拉河酌留兵之半駐歸化城三十一年詔發殺虎口倉粟賑其屬貧戶三十五年五月從大將軍費揚古山西路敗噶爾丹於昭莫多凱旋詔留軍營餘米給部衆十月發軍前馬疥者留其地餉牧三十六年費揚古檄所部兵會大軍於喀爾喀郡王善巴界師旋資從征兵銀五十四年三月因久雪傷牧產詔發呼坦和朔儲粟賑之雍正九年大軍勦噶爾丹策凌詔簡兵駐歸化城十年復隨鄂爾多斯郡王扎木揚駐烏喇特西界十三年徵還乾隆四年遣大臣察閱備調兵頒賞有差所部一旗駐牧塔噶渾河府四扎薩克多羅達爾漢貝勒一出

親王降虜附固山卓哩克圖貝子一山郡王降虜固山貝子一鎮國公一道光十二年與土默特爭界松筠往勘仍如舊界定之同治十一年肅州回匪東竄烏拉特杜爾道侍衛永德率兵進駐是部之和林果爾一帶堵截之四月杜爾進軍勦竄賽盟阿爾必特公等旗之匪飭是部與四子部落委員履覓民駝趣應軍需光緒末議興西盟墾務是部報卓克蘇拉塔一帶地段認墾有佐領四

烏喇特部在歸化城西至京師千五百二十里重西距二百十五里南北距三百里東茂明安及歸化城土默特西及南鄂爾多斯北喀爾喀右翼元太祖弟哈巴圖哈薩爾十五世孫布爾海游牧呼倫貝爾號所部曰烏喇特子五長賴喇次布揚武次阿爾薩瑚次布喀圖次巴爾賽後分烏喇特爲三賴喇孫鄂木布巴爾賽次子哈尼斯青台吉之孫色稜及第五子哈尼泰冰圖台吉之子圖巴分領其衆統號阿喀蒙古天聰七年率屬來歸貢駝馬八年從大軍征明由喀喇鄂博入得勝堡略大同克堡三臺一師旋以奈曼翁牛特部違令罪各罰

駝馬詔分給所部嗣征朝鮮喀爾喀及明錦州松山薊州皆以兵從順治五年叙功時鄂木布色稜已卒以圖巴掌中旗鄂木布子諤班掌前旗色稜子巴克巴海掌後旗各授扎薩克封鎮國公輔國公爵有差康熙二十六年上閱兵蘆溝橋命其部來朝人從觀二十七年噶爾丹侵喀爾喀諭嚴防汛二十九年噶爾丹襲喀爾喀昆都倫博碩克圖袞布踰烏勒扎河命選兵駐歸化城三十年以自厄魯特來歸之巴圖爾額爾克濟農和囉理叛逃詔備兵五百偵勦三十一年和囉理降徹所備兵歸十五年從西路大軍敗噶爾丹於昭莫多三十六年朔漠平上山甯夏凱旋四等台吉南春迎覲賀捷稱旨晉授一等台吉並優賚從征及坐塘監牧鑿井諸弁兵三十八年以其屬有貧爲盜者諭諸扎薩克教養之五十四年所部歉收以呼坦和朔儲粟賑之雍正九年大軍勦噶爾丹策凌諭選兵防游牧乾隆十九年議勦達瓦齊詔購駝馬送軍所部三旗駐牧哈達瑪爾爵三扎薩克鎮國公二輔國公一是部墾事最先乾隆三十年卽將沿河牧地私租民人耕種五十七年以積欠商人二萬兩允佃種五年之限道

光十二年扎薩克鎮國公巴圖鄂齊爾充烏蘭察布盟盟長以茂明安等旗爭地不報歸化城副都統輒向理藩院越訴奪盟長咸豐三年綏遠城將軍盛璉奏烏拉特三公旗生齒日繁漸形窮苦除欠民人債物及備辦軍台差使借貸銀錢無力償還陸續私租地畝數十處每處寬長百十里或數十里酌擬變通分別應禁應開下所司議行同治七年回匪東竄擾後套山西大同鎮總兵馬陞督兵往昆都崙溝台梁一帶防剿九年將軍定安奏烏拉特河北後套夙稱產糧之區而糧所由產皆出於內地民人私種蒙古游牧之地現金順張曜老湘卓勝各營軍糧無不購買於此擬請將三公旗游牧擊出地畝無論應開應禁均暫准種耕責令按畝收租留備各項差使之用所產糧石供各路軍糈時回匪陷磴口擾及是部後套一帶二月諭宜安遣宋慶一軍赴舍太一帶勦除北路竄匪尋鄂爾多斯貝子烏爾那遜督隊擊退六月諭定安等勸烏拉特居民趕興耕作以裕足食之源十二月諭金順防範烏拉特三旗地方游牧回匪十年三月回匪復自賽音諾顏之阿米爾畢特公旗擾是部中公旗洪庫勒塔

拉地方六月匪又擾中公旗之什巴克台杜嘎爾奏吉額洪額等軍大敗之于布特地方金運昌遣提督王鳳鳴剿前竄洪庫勒塔拉之匪于奔巴廟察洪噶爾廟皆殄之其後肅州回匪平烏拉特始息警自征回軍興西路文報及軍需駝馬皆由是部設台分段接替至阿拉善而止西陲肅清始復舊制二十三年山西巡撫胡聘之請開烏拉特三湖灣地方屯墾既得兪旨理藩院以蒙盟呈有碍游牧格其議二十九年護山西巡撫趙爾巽吳廷斌先後奏置五原廳同知以是時鄂爾多斯之達拉特杭錦兩旗寄居民人村落隸之時兵部侍郎貽穀督擊派員勸報地三十三年奏烏拉特前旗以達拉特旗東之什拉胡魯素紅門兔等地段後旗以黃河西岸之紅洞灣地段中旗以黃河西岸熟地莫多噶魯泰兩段報墾並修墻工擴渠道防衝突暢引灌仍以民多官少防範難周蒙人時有爭渠阻墾情事入告是部中旗有佐領十六前旗十二後旗六鄂爾多斯部在河套內至京師千一百里東歸化城土默特西阿拉善南陝西長城北烏喇特東西北三面皆距河袤延二千餘里元太祖十六世孫巴爾蘇

博羅特始居河套爲鄂爾多斯濟農子衮弼哩克圖墨爾根繼之有子九分牧而處今鄂爾多斯七札薩克皆其裔長諾顏達喇襲濟農號爲扎薩克郡王額璘臣一旗祖次巴雅斯呼朗諾顏爲扎薩克貝勒善丹一旗祖次偉達爾瑪諾顏爲扎薩克貝子沙克扎鎮國公小扎木素二旗祖次諾們塔喇尼華台吉爲扎薩克貝子額琳沁一旗祖次玻揚呼哩都噶爾岱吉爲扎薩克台吉定咱喇什一旗祖次巴雅喇偉徵諾顏爲扎薩克貝子色稜一旗祖次巴特瑪薩木巴幹次納穆達喇達爾漢諾顏次翁拉罕伊勒登台吉皆爲濟農屬察哈爾林丹汗虐其部濟農額琳臣與喀喇沁阿巴噶諸部長敗察哈爾兵四萬於土默特之趙城天聰九年大軍收林丹汗子額哲於黃河西托里圖地未至額璘臣私要額哲盟分其衆以行我軍追及之索所獲額璘臣懼獻察哈爾戶千餘自是所部內附頒授條約順治元年選兵隨英親王阿濟格赴陝西勦流賊李自成二年師旋得優賚六年台吉大扎木素及多爾濟叛劫我使圖噶錫敕曰聞爾等背叛卽欲加兵但念受朕恩有年且生靈堪惜故不忍遽用干戈爾能悔過



來朝卽宥罪恩養憐恃險不卽歸順當發兵窮爾蹤跡必不容爾偷生時額琿臣偕同族固喀岱吉善丹小扎木素沙克扎額琳沁色稜等攜自額濟內阿喇克鄂拉徙牧博羅陀海上嘉其不助逆詔封郡王貝勒貝子鎮國公有差各授扎薩克凡六旗七年大扎木素降詔宥其罪諭多爾濟降不從九年遣兵擒斬多爾濟於阿拉善康熙十三年冬調所部兵三千五百會剿陝西叛鎮王輔臣十四年復神木定邊花馬池各城堡叙功晉扎薩克等爵台吉各加一級十七年噶爾丹侵喀爾喀奉詔簡兵二千防汛三十五年上親征噶爾丹至所部界扎薩克等率屬渡河朝御營獻馬上手諭皇太子曰朕至鄂爾多斯地方見其人皆有禮貌不失舊時蒙古規模各旗俱和睦如一體無盜賊駝馬牛羊不必防守生計周全牲畜蕃盛較他蒙古殷富圍獵嫻熟雉兔復多所獻馬皆極馴取馬不用套竿隨手執之水土食物皆甚相宜三十六年允扎薩克等請設站阿都海軍奏及糧運俱由其地行時扎薩克等率兵扈蹕頒賚白金是年冬理藩院劾運米遲誤罪詔寬免五十一年諭曰鄂爾多斯饑饉洊臻戶口流散

可速遣官察覈務令各遂生業五十二年詔定其部牧界先是郡王松喇布請暫牧察罕托輝尙書穆和倫等往勘議於柳岑剛柳岑房岑西岑四臺外暫令駐牧至是甯夏總兵范時捷奏察罕托輝係版圖內地蒙古遊牧與民樵採混雜不便請令仍以黃河爲界遣官勘議從時捷所請五十四年詔簡兵二千從大軍防禦策妄阿喇布坦五十五年所部款收遣官往賑凡七千九百餘戶三萬一千餘丁雍正元年復命賑恤十年以調赴固爾班賽堪兵三千不堪用者五百又中途逃歸四百餘爲將軍達爾所濟劾論王貝勒貝子等罪各降爵尋以次子復乾隆元年詔增設一旗以一等台吉定咱喇什領之授扎薩克是年允陝西榆林神木等處邊民種鄂爾多斯餘閒套地完租四十九年陝甘總督福康安奏黃河改向西流原在河西民人反在河東鄂爾多斯蒙古貪利濫以現行黃河爲界謂民人占據所部游牧地方命侍郎賽音博爾克圖往勘仍如前黃河舊流之地爲界釘椿立碑所部七旗自爲一盟曰伊克昭與哲哩木卓索圖昭烏達錫林郭勒烏蘭察布五盟同列內札薩克左翼前旗一名準噶爾

旗駐札勒谷左翼中旗一名郡王旗駐敖西喜峯左翼後旗一名達拉特旗駐  
巴爾哈遜湖右翼前旗一名烏審旗駐巴哈池右翼中旗一名鄂拓克旗駐西  
喇布哩都池右翼後旗一名杭錦旗駐鄂爾吉虎泊後增一旗曰左翼前末旗  
一名札薩克旗爵八扎薩克多羅郡王一附輔國公一扎薩克多羅貝勒一扎  
薩克固山貝子四一由鎮國公晉襲扎薩克一等台吉一是部繫事最早乾隆  
以後是部招墾民人近陝西者分隸陝西神木定邊兩理事同知及神木府谷  
懷遠靖邊定邊等縣近山西者分隸薩拉齊托克托城清水河三廳偏關河曲  
等縣而因地滋爭之案亦時有道光八年達拉特旗之才吉波羅塔拉地方以  
抵還債項奏准租給商種五年十四年綏遠城將軍彥德奏達拉特旗台吉人  
等招民私墾驛站草地致越界侵種其旗游牧地方員子親往驅逐民人恃衆  
欲傷二等台吉薩音吉雅等詔山西巡撫鄂順安派員捕治之其後相沿奉部  
文而承種者有之由台吉私放者有之由各廟喇嘛公放者有之開墾頗多產  
糧亦盛同治初元回匪役興辦團練購糧儲蓄皆取濟於此是年調鄂爾多斯兵

赴甘協勦六年回匪屢入境皆爲貝子扎那格爾第兵所敗七年正月陝西甯  
條梁之陷匪遂大入游牧南自依克沙巴爾北至固爾根柴達木焚掠殆遍要  
地如古城答拉寨十里長灘諸處皆不守蒙兵不能戰屢請撤退四月綏遠城  
將軍德勒克多爾濟奏飭扎那格爾第簡精壯蒙兵五百合準噶爾旗壯丁及  
察哈爾馬隊各五百均歸統帶擇駐神木要隘相機迎勦別以達拉特旗兵五  
百駐適中草地朝旨飭甯夏副都統金順一軍援之六月金順深入蒙地遇匪  
于野狐井門家梁王家溝皆捷嵩武軍統領提督張曜一軍亦赴援屢挫之古  
城十里長灘之匪皆遁張曜又敗匪于達拉特旗進駐古城而竄杭錦烏審郡  
王等旗之匪亦爲綏遠城將軍所遣達爾濟一軍所敗是爲鄂部七旗初次肅  
清綏遠城將軍定安遂奏撤伊克昭盟兵一千九百回本游牧防守仍留前挑  
兵五百令那格爾第統帶探賊進勦十二月阿拉善之磴口不守回匪又大入  
鹽海子纏金一帶皆被擾時匪自磴口水陸進撲副都統杜嚙爾派滲領成山  
等合烏爾圖那逸兵分往纏金及阿拉善旗烏爾木頭地方勦之匪皆敗遁六

月張曜自古城進勦屢敗匪于察罕諾爾沙金托海追至賀蘭山達爾濟扎那格爾第兩軍擊殄杭錦達爾特郡王諸旗之匪朝旨又增遣宋慶一軍西援八月敗擾郡王旗之匪于東嶺擊退擾烏審鄂拓克等旗之匪進至哈拉寨金順軍磴口張曜軍寧夏沿途自舍太至三道河石筍山皆駐官軍宋慶是冬追勦逆于準噶爾昭盟海子諸處悉殄之九年金積回匪以官軍攻急自石筍北犯冀梗我運道於是沙金托海以西匪騎出沒而準噶爾杭錦鄂托克諸旗復擾宋慶達爾濟諸軍復進勦迭捷七月烏審旗管帶官赤樓多爾濟以勦匪陣亡于雀里木廟然各旗亦屢挫來擾之匪梅楞章京扎棟巴等以勦挫陝西懷遠邊外之匪予優獎是部再告奠至金積蕩平而警報始息歷次陣亡蒙旗官兵及出力者均時予卹獎其纏金諸地則山西仍置防戍光緒二年邊外馬賊肆擾是部達拉特杭錦等旗地戶商人蹂躪特重渠廢田蕪迄不可復十五伊克昭盟長貝子扎那濟爾迪呈準噶爾旗以頻年荒歉請開墾空閑牧場一段東西八十里南北十五里收租散賑接濟窮蒙下理藩院議行以招種民人分隸

山西河曲陝西府谷時歸化城土默特與達拉特旗以黃河改道爭界畧山西巡撫奎斌大理寺少卿郭勒敏布以綏遠城將軍斷分之案偏袒土默特奏勅命察哈爾都統紹祺往勘援乾隆五十一年黃河舊溝爲斷之論以南之地四成歸達拉特以北之地六成歸土默特尋經勘定北自烏拉特界南至準噶爾界達拉特應分地周六百四十八里十二年伊犁領隊大臣長庚奏纏金等處宜開屯田山西巡撫剛毅覆奏纏金卽才吉地在河北外套伊克昭盟之達拉特杭錦兩旗牧界河自改行南道蒙古始招商租種分佃修成渠道西則纏金計共五渠東則後套計共三渠紆迴約二百里中間支渠曲折蜿蜒不可枚數後遭馬賊之擾不特纏金牛壩商號不過數家卽後套左右亦只二百餘家達拉特旗昔歲收租銀十萬近所收租錢不及三千串閱伍至薩齊之包頭面與伊克昭盟長貝子扎那吉爾迪籌商謂當明示各旗斷不使該旗牧界日久歸於民人因上議屯三端曰分段曰修渠曰設官下所司議格二十六年爭匪之案鄂爾多斯七旗如達拉特鄂拓克烏審準噶爾各旗釀禍均重事定議有賠

欵達拉特一旗至三十七萬兩教堂欲得銀蒙旗欲抵地久未結十八年命兵部侍郎貽穀辦晉邊墾務咨調烏伊兩盟長詣歸化商訂迄未至而呈理藩院請免開辦廷旨下院嚴飭盟長迅與貽穀等會商不得推諉於是貽穀等先以贖還達拉特旗教案熟地二千頃給銀十七萬兩者爲墾務入手之策二十九年達拉特杭錦兩旗始派員就議報墾郡王鄂克烏審準噶爾扎薩克五旗亦相繼報地而杭錦旗貝子阿爾賓巴雅爾時充盟長仍請緩辦堅拒出具交地印文三十年貽穀以抗不遵辦掣動全局効之以副盟長烏審旗貝子察克都爾色楞代署三月套匪滋事山西練軍平之九月察克都爾色楞等以烏審扎薩克兩旗公中之地北起阿拜素南至巴蓋補拉克一段歸官報墾祝皇太后七旬萬壽子察克都爾色楞郡王銜沙克都爾扎布鎮國公銜三十一年二月阿爾賓巴雅爾復呈悔過情形報出杭錦旗中巴噶地一段貽穀奏烏伊兩盟地皆封建與察哈爾之比於郡縣者不同定押荒歲租皆一半歸官一半歸蒙別提修渠費旨下所司知之七月貽穀奏杭錦達拉特兩旗地戶將原有各渠

報効歸公因改長勝渠名長濟總金渠名永濟挑濬深通老郭等渠以次及之計可溉田萬頃後套地必州渠渠日加多卽地日廣就現在應收之款悉歸工作回環挹注務竟其功請各旗押荒地租各款應歸公者均暫緩提撥備渠工大修之費九月準噶爾旗協理台吉丹丕爾不悅於墾糾眾抗拒攻劫局所貽穀遺兵捕治之三十二年貽穀奏定郡王等五旗旱地押荒歲租陝西巡撫恩壽會奏以郡王扎薩克兩旗墾地置東勝廳隸山西歸綏道三十三年貽穀蒙諭復阿爾賓巴雅爾盟長信勤瑞良等相繼爲墾務大臣是部墾事進行未廢佐領卽左翼中旗十七右翼中旗八十四左右翼前旗各四十二左翼後旗四十右翼後旗三十六右翼前末旗十三

阿拉善厄魯特部至京師五千里東鄂爾多斯西濟納南寧夏涼州甘州北踰瀚海接賽音諾顏扎薩克爾盟袤延七百餘里卽賀蘭山地駐牧蒙古系出元太祖弟哈巴圖哈薩爾與和碩特同族和碩特舊爲四額特魯之一故稱額魯特部哈巴圖哈薩爾十九世至圖魯拜琥號順實汗有子巴延阿布該阿玉什



兄拜巴噶斯初育以爲子後自生子二長鄂齊爾圖次阿巴賴游牧河西套稱西套厄魯特巴延阿布該阿玉什號達賴烏巴什子十六居西套者曰和囉理曰墨爾根曰額爾克曰都喇勒曰哈什哈曰陀音曰土謝圖羅卜藏曰博第曰多爾濟扎布曰諾爾布扎木素曰愛博果特曰鄂木布和囉理號巴圖爾額爾克濟農以來歸授扎薩克賜牧阿拉善諸昆弟子姓隸之其居青海者曰扎布曰阿南達曰伊特格勒曰巴特巴扎布授扎薩克領其族見青海厄魯特部傳鄂齊爾圖號車臣拉子三長額爾德尼子噶勒丹多爾濟次噶爾第巴子羅卜藏賚布阿拉喇布坦次伊拉古克三班第達呼圖克圖後皆絕嗣阿巴賴裔爲準噶爾所掠故不著順治四年鄂齊爾圖遣使貢駝馬六年阿巴賴繼至七年鄂齊爾圖使至以喀爾喀煽蘇尼特部長騰機思判奏稱力能鋤逆當相機爲之否則亦必修貢如初不敢稍萌異志諭絕喀爾喀勿私通好嗣因額爾德尼噶爾第巴伊拉古克三班第達呼圖克圖及所部台吉宰桑等朝貢至者相接準噶爾台吉噶爾丹游牧阿爾台號博碩克圖汗覬爲厄魯特長鄂齊爾圖妻

以孫女阿努尋與隙康熙十六年噶爾丹以兵襲西套戕鄂齊爾圖破其部鄂齊爾圖妻曰多爾濟喇布坦與喀爾喀墨爾根汗額列克妻皆土爾扈特汗阿玉奇女兒也額列克孫察珅多爾濟號土謝圖濟汗偵噶爾丹侵鄂齊爾圖兵援之不及多爾濟喇布坦奔土爾扈特噶爾丹遣使獻俘諭曰鄂爾齊圖汗與噶爾丹向俱納貢今噶爾丹侵殺鄂齊爾圖獻所獲弓矢等物朕不忍納也其卻之西套厄魯特既潰或奔依達賴喇嘛或被噶爾丹掠去和囉理率族屬避居大草灘廬帳萬餘守汛者遣之去仍逐水草徒戀處邊外有楚琥爾烏巴什者噶爾丹叔父也子五長巴哈班第次阿南達次羅卜藏呼圖克圖次孛章次羅卜藏額琳沁噶爾丹以私憾襲殺巴哈班第執楚琥爾烏巴什及羅卜藏額琳沁等禁之巴哈班第子罕都爲和囉理甥時年十有三其屬額爾德尼和碩齊携之逃以兵四百掠烏拉喇特戶忒竄就和囉理居額濟內河喀爾喀台吉畢瑛里吉哩諦偵以告會青海墨爾根台吉等察獻額爾德尼和碩齊所掠遣使詰知爲罕噶爾圖諭噶爾丹捕額爾德尼和碩齊治罪并收和囉理歸牧或

非所屬當以告二十二年噶爾丹奏和囉理等歸達賴喇嘛已遣使召請以丑年四月爲限是年蓋歲在亥二十三年罕都借額爾德尼和碩齊遣使貢請宥掠烏喇特罪而和囉理戚屬管掠茂明安諸部牧產前以服罪故宥之至是諭曰和囉理旣免罪額爾德尼和碩齊等著一體赦所貢准上納先是羅卜藏衮布阿喇布坦避噶爾丹走唐古特以達賴喇嘛言表請賜居龍頭山轄西套遣衆命兵部督捕理事官拉都琥往勘奏言龍頭山蒙古謂之阿拉克鄂拉乃甘州城北東大山山脈絲延邊境山口卽邊關建夏口城距潢川堡五里山盡爲寧遠堡距龍頭山里許有昌寧湖界之內地兵民耕牧久以不宜令新附蒙古居上可其奏羅卜藏衮布阿喇布實徙牧布隆吉爾土謝圖汗瑯多爾濟以女妻之事聞詔廷臣曰前齊爾圖汗爲噶爾丹所戕其孫羅卜藏衮布阿喇布坦往求達賴喇嘛指授所居之地達賴喇嘛令駐牧阿拉克鄂拉因以爲請鄂齊爾圖汗從子和囉理前沿邊駐牧尋曾檄噶爾丹牧取之令羅卜藏衮布阿喇布坦與喀爾喀互爲犄角噶爾丹欲以兵向和囉理等則恐喀爾喀躡之欲以

兵向喀爾喀則恐和囉理等製之此必非噶爾丹所能牧取也二十四年和囉理請賜敕印給部衆廷臣以游牧未定議不允諭曰和囉理等以避亂故離其舊牧來至邊境劫掠茂明安烏喇特諸部本應卽行殄滅朕俯念鄂齊爾圖汗世奉職責恪恭奔走兼之彼亦迫於飢困是以宥其罪戾又羅布藏袞布阿喇布坦係鄂爾齊圖汗孫爲和囉理從子應令聚合一處其遺官往諭朕旨度可居地歸併安置封授名號給賜金印璽書以示朕興滅繼絕至意理藩院尙書阿喇尼遵旨往諭和囉理奏皇上令臣等聚處乃殊恩達賴喇嘛亦謂羅卜藏袞布阿喇布坦居布隆吉爾地隘草惡不若與臣同處臣等欲環居阿喇克山陰遏寇盜靖邊疆令部衆從此地而北當喀爾喀台吉畢瑪里吉哩諦牧地由噶爾拜瀚海額濟內河姑喇柰河雅布賴山巴顏努魯喀爾占布爾古特洪果爾鄂隆以內東倚喀爾喀丹津喇嘛牧西極高河居之奏至遣使諭達賴喇嘛曰噶爾丹滅鄂齊爾圖汗時和囉理及羅卜藏袞布阿喇布坦等紛紜離散來至邊境又以生計窘迫妄行劫掠朕宥其罪不卽發兵勦滅和囉理等亦戴朕

恩屢請敕印依朕爲命朕前諭噶爾丹收取彼約以丑年四月爲期今逾期已數月矣伊等骨肉分離散處失所朕心殊爲惻然鄂齊爾圖汗於爾喇嘛爲護法久矣何忍漠視其子孫宗族至於窮困今朕欲將伊等歸併安置爾喇嘛其遣使與朕使偕往定議二十五年達賴喇嘛奏已遣使上遣拉都琥往會勘拉都琥偕達賴喇嘛使約和囉理至東大山北語之曰爾所謂噶爾拜瀚海地聽爾游牧外自甯夏所屬玉泉營西羅薩喀喇山嘴後至賀蘭山陰一帶布爾哈蘇台口又自甯夏所屬倭波嶺塞口北努渾努魯山後甘州所屬鎮番塞口北沿陶蘭泰薩喇椿濟雷理希理等地西向至額濟內河俱以距邊六十里爲界畫地識之定議蒙古殺邊民論死盜牲畜奪食物者鞭之私入邊游牧者台吉宰桑各罰牲畜有差所屬犯科一次罰濟農牲畜以五九時罕都及額爾德尼和碩齊請與和囉理同牧羅卜藏袞布阿喇布坦偵其女兒阿努攜兵千赴藏道嘉峪關外懼嬰已備之以故未卽徙拉都琥奏至詔以所定地域及罰例檄甘肅守臣知之蓋自是和囉理屬始定牧阿拉善二十七年噶爾丹侵略喀

和囉理欲往援察理多爾濟乞師於朝時諭噶爾丹罷兵使已就道詔不允和囉理請而羅卜藏袞布阿喇布坦自率兵援喀爾喀遇我使於道宣諭之亦撤歸布隆吉爾察理多爾濟尋爲噶爾丹所敗上復遣使諭噶爾丹將行命之曰噶爾丹若問和囉理事爾等宜述丑年之約并言達賴喇嘛向雖遣使定議令和囉理與羅卜藏袞布阿喇布坦歸併安置迄今尙未同居和囉理雖居游牧邊地亦未編設旗隊前喀爾喀與額魯特交惡和囉理曾請兵討爾朕仍諭遣之曰朕欲使爾等安處游牧而已豈肯給爾兵耶其以是告之令罷兵噶爾丹不從二十八年以羅卜藏袞布阿喇布坦卒賜祭其妻及宰桑等請召噶爾丹多爾濟轄部衆允之時噶勒丹多爾濟游牧準噶爾界諭曰羅卜藏袞布阿喇布坦屬內附所遺部衆恐致流亡噶勒丹多爾濟尙幼召之恐未卽至著和囉理前往布隆吉爾暫爲約束人民俟噶勒丹多爾濟至仍歸本地務期共相扶掖勿侵據所部噶勒丹多爾濟以濟以所部饑告不卽徙詔授諾顏號遣侍讀學士達琥諭恤所部貧民其母扎木蘇攜噶勒丹多爾濟至詔轄羅卜藏袞布阿

喇布坦衆附阿拉善牧有拜達者罕都屬也偕額爾德尼和碩齊誘其主棄和囉理私以厄魯特兵千掠邊番守汛者責之爲所戕且抗官軍甘肅提督孫思克以兵屯邊將勦之罕都懼乃降詔宥罪仍駐牧阿拉善其叔父羅卜藏額琳沁尋自準噶爾至奏爲噶爾丹所禁十餘年以準噶爾與喀爾喀戰乘間脫鞬孛屬千餘至乞與兄子罕都同居允之三十年和囉理以不遵旨徙牧歸化城懼大兵討叛遁噶爾丹多爾濟羅卜藏額琳沁罕都等從之分道竄將軍尼雅漢等招降噶勒丹多爾濟屬納木喀班爾等五十餘戶和囉理女弟之夫克奇及從者二十一人以聞詔安置歸化城時和囉理弟博第游牧中衛邊外距阿拉善三百餘里聞其兄叛遁欲往會偵副將軍陳祚昌等屯昌寧湖遣子索諾木至軍詭稱假道詣南山否則請牧馬昌寧湖祚昌知爲緩軍計令挈屬至歸化城不從擊之斬五百餘級博第僅以身免走伊巴賴遇和囉理屬台吉齊奇克假糧馬竄額濟內河三十一年和囉理悔罪降命仍牧阿拉善羅卜藏額琳沁罕都齊奇克等從和囉理降其復叛走提督孫思克以兵追至庫勒圖斬四

十餘級齊奇克就擒詔宥死附和囉理牧羅卜藏額琳沁罕都逃遇自青海來歸之喀爾喀台吉阿海岱青班第掠其贖復竄哈密羅卜藏袋布阿喇布坦有女弟曰阿海始與策妄阿喇布坦議婚噶爾丹奪之策妄阿喇布坦怒噶爾丹徙額琳哈畢爾噶上聞之遣員外郎馬迪齋救諭令絕噶爾丹道哈密羅卜藏額琳沁罕都等偕噶爾丹屬圖克齊哈什哈哈爾海達顏額爾克以兵劫之由大草灘毀邊垣遁爲青海台吉額爾德尼納木扎勒所擊走死三十三年和囉理弟博第率屬百餘降乞仍與兄同牧許之命輯所屬潰散者未幾齊奇克復叛遁和囉理遣所部莽奈哈什哈等以兵追諸耨爾格山諭之降不從擊斬之三十五年所部兵隨西路大軍敗噶爾丹於昭莫多副都統阿南達奉命設哨以和囉理屬布爾噶齊達爾漢宰桑瑪賴額爾克哈什哈齊勞墨爾根薩里呼納沁齊倫理塔漢占哈什布達哩杜喇勒和碩齊等分屯額布格特阿木格特昆都倫額濟內及布隆吉爾之博羅椿濟敖齊喀喇莽奈諸地時噶爾丹多爾濟竄徙嘉峪關外有哨卒拜格者其屬也阿南達召至遣歸說噶爾丹多爾



濟曰上待汝恩甚厚將撫育之顧叛逃可乎和囉理棄牧時汝不能輯屬故從  
往上灼知汝情念汝祖鄂齊爾圖汗將玉成汝汝其恩之鳴爾丹多爾濟遣告  
曰上念臣祖兄令臣與和囉理接壤居臣無知從和囉理叛遁今悔罪欲死臣  
幼臣母一婦人未能達乞以情代奏阿南達欲堅內附志遣使歸約如期會肅  
州諭設哈密復檄哈密伯克額貝都拉曰噶爾丹至汝地汝卽召噶爾丹  
多爾濟援勿復疑噶爾丹多爾濟遣宰桑阿約等齎降表表至肅州會上視師  
甯夏阿南達馳疏至詔優恤所部衆未幾唐古特部第巴煽青海諸台吉盟察  
罕托羅海繕軍械助勒丹檄噶爾丹爾濟以兵往辭不赴遣使俄濟通問策安  
阿喇布坦自攜兵百會阿南達於布隆台吉爾阿南達偵噶爾丹死其從子丹  
濟拉寬詢海遣噶爾丹多爾濟屬輝特台吉羅卜藏等馳赴噶斯而自偕噶爾  
丹多爾濟以兵繼之至色爾滕值俄濟歸以丹濟拉將自鄂蠻喇嘛所往附策  
安阿喇布坦告因撤噶斯兵遣噶爾丹多爾濟仍赴布隆設哈其屬阿勒達爾  
哈什哈恭格等煽之叛至西欣驛劫駝馬奉毋札木蘇山吉爾喀喇烏蘇遁阿

南達遣兵四百追之不及招降其屬茂海烏納恩巴爾爾喇木札木巴阿喇木把及輝特台吉羅卜藏等遣歸阿拉善羅卜藏後徒牧喀爾喀卽附札薩克圖汗部之厄魯特札薩克也是年和囉理以所部數叛請視四十九旗例編佐領廷臣議徙烏喇特界諭曰若將和囉理移牧近地則沿邊別部蒙古甚多豈可盡徙且治蒙古貴得其道不係地之遠近著停徙仍游牧阿拉善地詔和囉理爲多羅貝勒給扎薩克印復以噶爾丹多爾濟竄赴準噶爾敕策妄阿喇布坦曰噶爾丹多爾濟率屬來降安置耕種今忽留其屬人乘衆私遁其中必有不得已之情務卽察明具奏朕於噶爾丹多爾濟略無責備之意且降旨收集其遺衆儻往汝地汝可善爲撫恤如欲內徙卽行遣歸時噶爾丹多爾濟陽附策妄阿喇布坦陰貳之策妄阿喇布坦將侵哈薩克噶爾丹多爾濟詭以兵從中道遁庫車爲回衆所殺母札木蘇攜屬九百餘奔青海部青海諸台吉以獻詔安置什巴爾臺隸察哈爾康熙四十三年和囉理子阿寶尙郡主授和碩額駙賜第京師四十八年襲貝勒五十四年以參贊往台西安將軍廣柱等駐巴

里坤襲擊準噶於伊勒布爾布爾和碩阿克塔斯烏魯木齊諸地皆捷五十九年參贊平逆將軍延信軍敗準噶爾有克河齊諾郭勒絳瑪喇諸捷護達賴喇嘛入藏年羹堯奉遣歸游牧未幾來朝上憫其勞詔封多羅郡王雍正二年大軍定青海王大臣等議阿拉善爲甯夏邊外要地青海顧實汗諸子裔裔皆游牧山後今或徙山前請勅阿喇善扎薩克郡王阿寶飭青海衆歸牧山後允之阿寶奏臣祖顧實汗歸誠內附百年於茲受天朝恩甚厚前青海昆弟阻兵構亂上千天討臣當東身受誅重荷恩宥令安游牧感激莫報乞賜青海曠地令臣鈐諸部不復萌異志詔以青海貝子丹忠所遺博囉充克克牧地給之并諭撫遠大將軍年羹堯遣員齎餉助徙牧博囉充克克者卽漢書地理志所稱潢水也七年阿寶以博囉充克克牧地隘狹請徙烏蘭穆倫及額濟內河界議罪削爵尋命復之詔仍歸阿拉善牧不復居青海阿寶子袞布八年以所部兵赴巴里坤防軍噶爾授樊廷賊遁九年錄其勞封輔國公十年晉貝子乾隆六年降製府之索諾木多爾濟爲鎮國公二十一年二等台吉達瓦車凌從大軍勦

厄魯特竄黨遇伏於博囉齊奮擊之陣歿詔議卹入祀昭忠祠先是阿寶屬達瑪琳從靖邊大將軍傅爾丹擊準噶爾於和通呼爾哈諾爾爲所掠至是攜孥及屬布庫勒等四十戶詣都統雅爾哈善軍請歸阿拉善舊牧詔如所請徒衆仍置伊犁所部旗一爵三曰扎薩克和碩親王由貝勒晉襲附鎮國公一一由貝子降襲一由輔國公晉襲阿寶次子羅卜藏多爾濟初襲貝勒乾隆二十一年詔以兵赴北路二十二年以俘逆賊巴雅爾功晉郡王授參贊大臣二十三年以勦俘已叛宰桑恩克圖功予眼花翎二十四年以台吉達瓦佐領布岱等勦瑪哈沁及逆回布拉呢敦功優賚之三十年晉羅卜藏多爾濟親王三十七年十一月以甘肅民人私挖阿拉善旗哈布塔哈拉山會沙命勒爾謹捕沿之四十六年大軍勦薩拉爾逆回於華林寺四十九年大軍勦逆回於石峰堡邸店是部皆以兵從均有功五十一年允阿拉善鹽由水路運至山西臨縣磧口五十六年是部鹽入銀八千兩羅卜藏多爾濟子旺沁班巴爾襲親王後晉一爲甯夏將軍以和庶屬人爭勘地界罷之嘉慶四年陝甘總督長麟奏徵是部

征教匪兵歸其部五年甘肅按察使姜開陽疏言中衛邊外有大小鹽池合爲阿拉善王所轄其鹽潔白堅好內地之民皆喜食之大約甘肅金省食阿拉善鹽者十分之六陝西一省亦居其三聞阿拉善王但於兩池置官收稅不論蒙古漢人聽其轉運故於民其便私販甚多駱駝牛騾什佰成羣特棍格關吏役不敢呵止今擬令沿邊各州縣於各隘口鹽所從入之處設局收稅亦計所賦多少爲稅之輕重彼所收者池稅我所收者過稅既無碍於阿拉善王又易私販爲官販兩便之道十一年阿拉善王因回民私販罷法獻其池歸官辦置運判於磴口每年予阿拉善王銀八千兩池屬甯夏道專管十七年改歸商辦酌定口岸示以限制改磴口大使爲甯甫川大使專司稽察吉鹽水販止准運至甯甫川以鹽池救還阿拉善王停其償歲而以吉鹽八萬七千餘引配於潞引由潞商包納吉課咸豐四年七月親王呈指輪開采哈勒津庫察地方銀鑛定甘肅收阿拉善鹽商稅濟軍餉同治初年回匪滋事屢征是部兵協勦三年阿拉善親王貢桑珠爾默特以匪擾甯夏呈理藩院乞援時西路多警是部設臺

遞送南白甘涼西白額濟訥土爾渥特軍報至烏拉特以達歸化四年四月都  
興阿軍大破回匪於平羅寶豐是旗協理台吉阿布哩亦敗撲入磨石口之匪  
諭嘉獎貢桑珠爾默特仍飭嚴防各口兼辦駝運七年貢桑珠爾默特採買米  
麥濟穆圖善中鋪之軍解耕牛一百餘隻酌借貧民俾時耕種四月奏入上復  
嘉獎之十二月回匪由平羅竄是部大肆劫掠至磴口踞之攻圍王府殺傷官  
兵貢爾桑珠默特復咨穆圖善乞援八年定安派蒙員烏爾罔那遜往是部烏  
蘭木頭地方勦陸路回匪四月屢敗回匪於下永和姜上永和姜磴口踞匪還  
竄陝境是月董馬原回匪竄是部境圍定遠營城燬家塾府第寺廟鄂爾多斯  
與額濟訥河土爾扈特文報路斷貢桑珠爾默特督蒙古官兵嬰城固守七月  
九日提督張曜遣部將楊春祥等率兵解定遠城之圍匪退廣宗寺又敗之越  
山遁次日楊春祥等進軍賀蘭山八月金順進軍磴口遂次平羅九月張曜抵  
甯夏沿途之沙金托海三道河磴口石嘴凶等處皆駐官軍九年十一月回匪  
復竄阿拉善南界之紅井一帶貢桑珠爾默特派副佐領鄂肯會官軍副將郝

永剛等敗之匪竄水磴口掠阿拉善復設驛站十一處十年五月金順奏甯夏山後阿拉善旗有西來竄賊劫掠現籌於南北要衝磴口橫城等處派隊扼紮十一年賽盟阿爾米畢特旗竄來回匪至沙爾雜一帶張曜以阿拉善王請兵勦辦合係金彪分紮柳林湖一帶兼顧蒙地是年八月陝甘總督左宗棠奏准蒙盟仍祇從一條山五下寺至阜蘭靖遠條城經安定會甯隴西秦州轉運漢南一帶銷售每百斤收稅銀釐銀各八分十三年四月袁保恒奏甯夏採運須取道阿拉善額濟訥蒙古草地以達巴里坤而額濟訥牧地近年被匪蹂躪最深無可藉資必以阿拉善駝隻爲主當飭阿拉善協理台吉派員來甯商辦臣與管旗章京瑪呢阿爾得那籌擬按程設立三十四台專司帶領道路另僱蒙駝一千五百民駝五百各以五百任運一段班轉遞運每次可運官斛八百石限四月運至巴里坤間二十日由甯夏發運一次諭左宗棠酌度情形派員赴甯夏接辦光緒四年七月以關內外肅清裁阿拉善所設驛站二十六年卒匪滋事阿拉善亦出教案二十七年三月子各省官員上年保教不力懲處阿

拉善親王貢桑珠爾默特傳旨申飭其後是部三道河一帶教堂租種地畝益多引河爲渠開田萬頃日以富饒宣統二年督辦鹽政大臣載澤奏山西行銷蒙鹽西路以阿拉善爲主以鄂爾多斯輔之有贖有林木幅員廣闊其北毗連賽盟南境各旗南隣甘肅鎮番等九縣爲漠南蒙古大部落自爲一部不設盟受甯夏將軍節制有佐領八

額濟訥舊土爾扈特部在阿拉善旗之西東古爾爾南甘肅毛目縣丞地北阿濟山東南合黎山南與東北西北皆大戈壁當甘肅省甘州府及肅州邊外系出翁罕六世孫曰瑪哈齊蒙古有子二長曰貝果鄂爾勒克有曾孫曰書庫爾岱青第四子曰納木第凌生納扎爾瑪穆特爲土爾扈特阿王奇汗族弟阿王奇汗游牧額濟河康熙四年詔封納扎爾瑪木特之子阿喇布珠爾爲固山貝子賜牧色爾騰先是阿喇布珠爾嘗假道準噶爾謁達賴喇嘛既而阿王奇與準噶爾丹策妄阿喇修怨阿喇布珠爾自唐古特還以準噶爾道梗留嘉峪關外遣使至京師上憫其無歸故有是命五十五年阿喇布珠爾奏請從軍効



力詔率兵五百駐噶斯旋卒子丹衷襲雍正七年來朝晉貝勒九年以色爾騰  
牧通噶斯之察罕齊老圖懼準噶爾掠乞內徙陝甘總督查郎阿令攜戚屬游  
牧阿拉克山阿勒坦特卜什等處尋定牧額濟納河乾隆四十八年子世襲罔  
替同治中回匪滋事陷肅州是部與連境蹂躪特重時西路文報梗是部設台  
站遞至阿拉善以達歸化九年以後肅州回匪累出擾是部境以北竄賽扎兩  
盟犯烏里雅蘇台科布多福濟定安張廷岳先後奏賊匪皆來自土爾扈特貝  
勒游牧請飭左宗棠撥軍防勦十二年是部貝勒達什車凌以防堵回匪陣亡  
光緒五年大學士陝甘總督左宗棠爲請卹十二月贈郡王銜子卹銀一千一  
百兩三十年延祉等迎護達賴喇嘛往西南經是部地雖戈壁較諸部爲瘠苦  
北接扎盟南境各旗有佐領一不設盟長受陝甘總督節制